



古香齋新刻袖珍淵鑑類函卷二百六十三

人部二十二諱 閩情

諱一

增山堂肆考曰夫諱非古也周人以諡易名於是有諱禮故曲禮入國而問諱然所謂諱者諱死不諱生也又有不諱者禮不諱嫌名二名不偏諱逮事父母則諱王父母不逮事父母則不諱王父母君所無私諱大夫之所有公諱詩書不諱臨文不諱廟中不諱夫人之諱雖質君之前臣不諱也婦諱不出門大功小功不諱

諱二



增齊東野語曰周頌祀文武祝之樂歌雖曰克昌厥後
噫嘻曰駿發爾私此廟中不諱也春秋僖公名申而書
戎申定公名宋而書宋仲幾莊公名同而書同盟此臨
文不諱也文王諱昌而箕子陳洪範曰使羞其行而邦
其昌厲王諱胡而宣王時詩曰胡不相畏胡為虺蜴周
禮有昌本之俎詩有鬻發之詠大誥弗棄基不諱后稷
棄字孔子父叔梁紇而春秋書臧孫紇成王諱誦而吉
甫作誦之句正在其時此詩書不諱也 顏氏家訓曰
凡避諱者皆須得其同訓以代換之桓公名白傳有五
皓之稱厲王名長琴有修短之目不聞謂布帛為布皓

賢腸為腎修也 史宋世家注曰莊子曰宋桓公行未
出城門其前驅呼辟蒙人止之以為狂也司馬彪云呼
辟使人避道蒙人以桓公名辟而前驅呼辟故為狂也
天中記曰西漢景帝諱啓史記微子啓作微子開武
帝諱徹以徹侯為通侯蒯徹為蒯通宣帝諱詢以荀卿
為孫卿元帝諱奭以奭氏為盛氏 四朝聞見錄曰漢
呂后諱雉封禪書謂野雞夜雉晉簡文鄭后諱阿春以
春秋為陽秋武后諱曩以詔書為制書鮑照為鮑昭金
鳳花中都謂鳳兒花光宗后慈懿李氏名鳳娘六宮避
諱稱曰好兒女花 天中記曰東漢明帝諱莊相襲謂

莊爲嚴莊光爲嚴光莊君平爲嚴君平殤帝諱隆以隆慮爲林慮安帝父諱慶以慶氏爲賀氏 又曰范曄父名泰後漢書郭林宗爲郭太鄭公業爲鄭太 合璧事類曰魏司馬朗字伯達九歲客有犯其父字者朗曰慢人親者不敬其親者也客謝之 地志曰吳黃龍三年嘉禾生由拳改縣曰禾與後孫皓父名禾改曰嘉興兼明書曰吳主之女名二十而江南人呼二十爲念北人不爲之避也 天中記曰晉諱司馬師以師保爲保傳以京師爲京都諱司馬昭以昭穆爲韶穆昭君爲明君韋昭爲韋曜 又曰王羲之祖諱正每書正月爲初

月或作一月餘則以政字代之 晉禮志曰太元十三年召孔安國爲侍中表以王愉名犯私諱不得連署求解有司議云名終諱之有心所同聞名心瞿亦明前誥而禮復云君所無私諱大夫之所有公諱無私諱先王祐名犯父諱聽許換曹蓋是恩出制外耳夫皇朝禮大百僚備職編官列曹動相經涉若以私諱人遂其心則移官易職遷流莫已 輿地志曰晉東海王越世子名毗中宗爲越所表遣渡江故改毗陵爲晉陵 又曰趙辟石勒諱羅勒爲蘭香馬勒爲轡錢武肅王諱鏐劉家爲金家留住爲駐住 顏氏家訓曰梁武小名阿練子

孫皆呼練爲絹乃謂銷鍊物爲銷絹物恐乖其義或有
諱雲者呼紛紜爲紛煙有諱桐者呼梧桐樹爲白鐵樹
便似戲笑耳 續墨客揮犀曰王僧彥父名師古嘗自
呼硯爲墨池謂鼓爲皮棚人或誤犯輒以他事中之曾
知嶺南一郡有李彥古者以進納得官過郡請謁遂題
刺云永州司戶參軍李墨池皮棚謹祇候參僧彥一見
大喜示其子弟曰奉人當如此矣 南史曰王亮王攸
之子爲晉陵太守在職清公有美政時有晉陵令沈瓚
之性麤疎好犯亮諱亮不堪遂啓代之瓚之怏怏乃造
坐云下官以犯諱被代未知明府諱若爲猷字當作酋

旁安犬猶字爲犬傍安酋或有心悠無心攸乞告示亮
不及履下牀跣而走瓚之撫掌大笑而去 顏氏家訓
曰劉縉緩綏兄弟並爲名器其父名昭一生不爲照字
唯依爾雅火傍作炤耳然凡文與正諱相犯當自可避
其有同音異字不可悉然呂尚之見如不爲上趙壹之
子倘不作一便是下筆卽妨是書皆觸也 北史曰宋
如周以府僚隨蕭管至度支尚書嘗有人訴事於如周
謂爲曾作如州官也乃曰某有屈滯故來訴如州官如
周曰爾何人敢呼我名其人慚謝曰祇言如州官作如
州不知如州官名如周早知如州官名如周則不敢喚

如州官作如州如周大笑曰令卿自責見侮反深衆咸服其寬雅 又曰熊安生字植之將通名見徐之才和士開二人相對以之才諱雄士開諱安乃稱觸觸生羣公哂之 因話錄曰韓僕射臯嘗病小瘡令醫傅膏藥藥不濡臯因問之醫云天寒膏硬臯笑曰韓臯實是硬的竟不以爲過 天中記曰隋帝諱忠凡郎中皆去中字侍中爲侍內中書爲內史中廬爲次廬魏徵隋書凡忠字皆謂之誠煬帝諱廣以廣樂爲長樂廣陵爲江都吳地記曰蘇州許墅本名虎嘍唐氏諱虎錢氏諱鏐因改名 游宦記聞曰唐太宗諱世民故今時業弄皆

去世而從云漏泄縲紲皆去世而從曳民則易而從氏昏愍泯之類至今猶或從氏也 天中記曰高宗諱治凡言治皆曰理明皇諱隆基太乙神君基民基並改爲其字隆州爲閬中代宗諱豫以豫章爲鍾陵德宗諱适改括州爲處州穆宗諱恒以恒山爲常山 楚語曰王元后父諱禁以禁中爲省中武后父諱華以華州爲太州 天中記曰李翱父名楚金故爲文皆以今爲茲 又曰崔允五拜相權傾天下其父慎由人改呼油爲麻膏避其諱時號爲麻膏相公 翰府名談曰楊行密據江淮至今滁人謂荇溪爲菱溪杏爲甜梅揚州民呼蜜

爲蜂糖 雲麓漫抄曰梁朱溫父諱誠改城爲牆又改曰州如東都州南州北是也 五代史補曰馮道在中書有舉子李導投贄所業馮戲謂曰老夫名道秀才不可謂不知然亦名道於禮可乎李抗聲對曰相公是無寸的道字小子是有寸的導字何謂不可馮笑曰老夫不惟名無寸諸事亦無寸吾子可謂知人矣了無怒色籍川笑林曰馮道門客講道德經首章有道可道非常道門客見道字是馮名乃曰不敢說可不敢說非常不敢說 猗覺寮曰錢元瓘在浙浙人以一貫爲一千青箱雜記曰宋太祖諱匡允語訛近香印故賣香印

者不敢斥呼鳴鑼而已仁宗諱禎語訛近蒸故呼蒸餅爲炊餅 又曰劉溫叟父名岳終身不聽樂不遊嵩岱每赴內宴聞鈞奏則涕泣移時曰若非君命則不至是吹劔錄曰寇準當軸人避其諱去十爲准至今書承用之 天中記曰蘇子瞻祖名序故以序爲敘或改作引字 老學菴筆記曰承平時有宗室名宗漢自惡人犯其名謂漢字曰兵士舉宮皆然其妻供羅漢其子授漢書宮中人曰今日夫人召僧供十八大阿羅兵士太保請官教點兵士書都下聞然傳以爲笑 閒燕常談曰薛肇明謹事蔡元長至戒家人避其名宣和末有朝

士新買一婢頗熟事因會客命出侑尊忽一客語及京
字婢遽請罰酒問其故曰犯太師諱一座駭愕婢具述
先在薛太尉家每見與賓客會飲有犯京字必舉罰平
日家人誤犯必加叱詈太尉脫或自犯則自批其頰以
示戒云 稗史曰錢良臣自諱其名幼子頗慧凡經史
中有良臣字輒改之一日讀孟子今之所謂良臣古之
所謂民賊也遂改云今之所謂參參古之所謂民賊也
殊為可笑

諱三

增正征 杜度 正義正周正建子之正也始皇以正月
且生於趙因名為政後以始皇諱故音

征 資暇集杜恕篤論云杜伯度名操字伯度曹魏時
以其名同武帝故隱而舉字後人見其姓杜字伯度又
削去伯字 秀為茂 淵作海 肆考漢光武諱秀改秀
呼為杜度 高祖諱淵故唐人 改鍾為蔣 易虎為龍 肆考吳孫
稱劉淵為劉元海 子文廟於鍾山因避祖諱改為蔣山 天中記唐高祖
之祖諱虎字延壽作史者易石虎以季龍易韓擒虎以
韓 擒 乞換他郡 改為辭曹 峻司徒王導欲出王舒為
外援乃拜舒撫軍會稽內史舒上疏以父名會不作會
稽廷尉以字同音異於禮無嫌舒陳音雖異而字同乞
換他郡於是改會為檜 又曰晉羊祜為荊州刺 稱
史及卒有遺愛州人為諱其名改戶曹為辭曹 稱
嚴必泣 因樂不歡 顏氏家訓臧逢世嚴之子也孝元
競修箋書有稱嚴寒者對之必流涕 丁用晦芝田
錄韋翼有重名生平不飲酒不務歡為家諱樂也
更授少傅 改擢司門 肆考唐源乾曜遷太子少師避
祖名更授少傅 又曰唐李涵

古今類事卷之三十一 人部 諱 七

由御史大夫擢太子少傅呂渭建言涵父名少
康當避宰相崔祐甫善其言改擢司門員外郎

舉名 易以孟姓 又曰唐韋暢父臯沒蜀人德之凡刻
石著臯名者皆鑿去其文以諱之

又曰唐王維初過郢州畫孟浩然像於刺史亭因名其
亭曰浩然亭咸通中鄭誠謂賢者名不可斥改號曰孟

亭皮日 固辭詹事 不受舍人 又曰劉宋范曄遷太
休作記 辭朝議以禮不諱嫌名乃居之 又曰唐賈曾授中書

舍人以父名忠固辭不受議者以中書是曹司名曾父
名音同字別於禮

無嫌曾乃就職 避會作當 更名曰右 尚書省文
字下六司諸路例皆言勘會至曾魯公為相始作勘當

以其父名會避之也 五代石昂為高行節度使符習
召以為臨淄令習朝京師監軍楊彥朗知留後昂以公

事至府上謁贊者以彥朗諱石更昂姓為右昂趨於庭
仰責彥朗曰常侍奈何以私害公昂姓石

非右也彥朗大怒拂衣起昂即趨出解官 遇石不踐
呼酒犯名 山堂肆考宋徐積以父名石平生不用石

器遇石則避不踐 世說晉桓靈寶呼人

温酒道其父名既而
曰英雄正自巖疎

諱四

增諱君 左傳魯大夫申繻曰晉以僖侯廢司徒宋以武
公名司空二山具敖 諱父 司馬遷報任少卿書同子

故曰 不諱君名 肆考三國志猶不諱其君名如 請
同子 功以權成是真斥吳主之名也

長吏諱 又曰晉王述為揚州刺史初至郡主簿請諱報
曰亡祖先君名播海內遠近所知內諱不出門

餘無 不犯人名 孔帖柳沖傳晉太元中賈弼譔姓氏
所諱 簿狀十八州百十六郡合七百一十

二篇甄別士庶無所遺宋王弘劉湛好其書每日對千
人不犯一人諱又梁武帝詔王僧孺改百家譜合二百

七十二卷藏在秘閣王弘好 益羹犯名 肆考宋殷淳
其書日對干客不犯一人諱

易共食尊羹芋羹盡易曰益殷尊羹易 改門 南史宋
司空無忌子也淳徐輟飭曰何無忌憚

五言詩 監製 人部 諱

鸞追封靖世子鳳始安靖王改華林鳳莊門為望賢門太極東堂畫鳳鳥題為神鳥而改鸞鳥為神雀

避犯友名 顏氏家訓揚都一士人諱審者而與避太

子諱 肆考唐憲宗方為太子王紹避諱改名時議者以復正於諱李藩曰自古故事由不議禮之人敗之不可

不諱父名 侯鯖錄王立之云老杜家諱閑而紹何誅 杜詩中有翩翩戲蝶過閑慢之句

改弘為崇 五代史郭崇韜父諱弘宰相豆盧革等皆諂事之因他事奏改弘文館為崇文館

諱官枉法 青箱雜記宋杜衍嘗言父母之諱在我而已他人何與焉故公帥并州時門吏請家

諱行曰下官無所諱但諱取枉法賊 **諱吏有** 賦翰府名談包拯尹京兆

無所諱惟諱 **不諱字** 朱子語錄或問子思稱夫子為吏有枉法者 仲尼先生曰古人未嘗諱其字

程先生曰予年十四從周茂叔伊川亦嘗呼明道表德又顏氏家訓孔子弟子記事書皆稱仲尼呂后徵時嘗

字高祖字季至漢袁鍾字其叔曰絲王丹與侯霸子語稱霸為君房江南至今不諱字也 **不諱名**

語錄唐人尚不諱名故杜詩云白也 **改準為貨** 石林燕語

詩無敵李詩曰飯顆山頭逢杜甫 京師舊有平準務自漢以來有是名 蔡魯公以其父名準改為平貨務

諱五

增唐韓愈諱辨 曰愈與李賀書勸賀舉進士有與賀爭

名者毀之曰賀父名晉肅賀不舉進士為是勸之舉者

為非愈曰律云二名不偏諱謂若言徵不稱在言在不

稱徵也律云不諱嫌名謂若禹與雨邱與蔭之類也今

賀父名晉肅賀舉進士為犯二名律乎為犯嫌名律乎

父名晉肅子不得舉進士若父名仁子不得為人乎夫

諱始於何時作法制以教天下者非周公孔子歟周公

作詩不諱孔子不偏諱一名春秋不譏不諱嫌名康王
釗之孫實爲昭王曾參之父皙曾子不諱昔周之時有
騏期漢之時有杜度此其子宜如何諱將諱其嫌遂諱
其姓乎將不諱其嫌者乎漢諱武帝名徹爲通不聞又諱
諱車轍之轍爲某字也諱呂氏名雉爲野雞不聞又諱
治天下之治爲某字也今上章及奏未聞諱游勢秉機
也惟宦官宮妾乃不敢言諭及機以爲觸犯士君子言
語行事宜何所法守也今考之於經質之於律稽之以
國家之典賀舉進士爲可耶爲不可耶 宋朱晦菴論
諱曰周人以諱事神然離詩與噫嘻詩皆不爲文武諱

特不敢指曰文王昌武王發若泛用二字則不諱如穆
王名滿其後有王孫滿襄王名鄭諸侯亦有衛侯鄭雖
曰魯以獻武廢二山是特當時爲尊者諱故改具敖之
名而承襲不易厥後又有公孫敖亦足以見泛而言之
未嘗諱也

閨情一

原詩曰自伯之東首如飛蓬豈無膏沐誰適爲容 又
曰角枕粲兮錦衾爛兮予美亡此誰與獨旦 又曰我
徂東山惓惓不歸我來自東零雨其濛鶴鳴於垤婦歎
於室 又曰終朝采綠不盈一掬予髮曲局薄言歸沐

終朝采藍不盈一襜五日爲期六日不詹 又曰靜女其姝俟我於城隅愛而不見搔首踟躕 又曰燕爾新婚如兄如弟 又曰未見君子憂心忡忡亦既見止亦既覯止我心則降 又曰未見君子憂心悒悒亦既見止亦既覯止我心則悅

閨情二

原詩序曰采綠刺怨曠也幽王之時多怨曠者 左傳晉叔向曰昔賈大夫惡娶妻而美三年不言不笑御以如臯射雉獲之其妻始笑而言 又晉文公謂季隗曰待我二十五年不來而後嫁季隗曰我二十五年矣又

如是而嫁則就木焉 漢書曰張敞爲婦畫眉帝知問之敞曰閨房之內夫婦之私有過此者 又曰李夫人得幸武帝而卒上憐閔焉圖畫其像於甘泉宮初李夫人病篤上自臨候之夫人蒙被謝曰妾久寢病形貌毀壞不可以見帝上曰夫人病亦甚殆將不起一見我屬託兄弟豈不快哉夫人曰尊官在帝不在一見上復言欲必見之夫人遂轉向獻歛而不復言上不悅而起夫人姊妹讓之曰獨不可一見上囑託兄弟耶夫人曰不見帝者乃欲以深託兄弟也夫以色事人者色衰則愛弛上所戀戀念我以平生容貌也今見我毀壞顏色非

故必畏惡吐弃我尚肯復思錄其兄弟哉 世說曰王
 渾妻鍾夫人每嘗卿渾渾曰詎可爾妻曰憐卿愛卿是
 以卿卿我不卿卿誰當卿卿 又曰荀奉倩妻曹氏有
 艷色妻嘗病熱奉倩乃出中庭取冷還以身慰之妻亡
 人弔不哭而神傷無幾奉倩亦卒 又曰孫楚妻亡至
 祥仍為詩以悼之王武子見其文曰未知文生於情情
 生於文見此使人增伉儷之重 風俗通曰有張伯偕
 仲偕兄弟形貌絕相類仲偕妻新妝竟忽見伯偕乃戲
 問曰今日妝飾好否伯偕應之曰我伯偕也妻乃趨避
 之須臾又見伯偕猶以為仲偕告云向大錯誤伯偕曰

我故伯偕也

閨情三

原牽衣

斂枕

魏文帝詩將適千里道妻子牽衣袂

徒谷反

攀李

樹萱

攀桃李兮不忍別 詩曰焉得萱草言樹之背願言思伯使我心海

作泥

化石

古詩妾作濁水泥 望夫不歸身化石於山之上

織廻文

守空牀

寶酒妻織錦廻文以寄 古詩空牀難獨守

閨情四

原詩

古詩曰青青河畔草鬱鬱園中柳盈盈樓上女皎

皎當窓牖娥娥紅粉妝纖纖出素手昔為娼家女今為
 蕩子婦蕩子行不歸空牀難獨守 又曰蘭若生春陽

涉冬猶盛滋願言追昔愛情款感四時美人在雲端天
路隔無期 魏曹植詩曰攬衣出中閨逍遙步兩楹閒
房何寂寥綠草被堦庭空穴自生風百鳥翩南征春思
安可忘憂戚與君并佳人在遠道妾身單且歎歡會難
再遇芝蘭不重榮人皆棄舊愛君豈若平生寄松爲女
蘿依水如浮萍齋身奉衿帶朝夕不墮傾儻終顧盼恩
永副我中情 又曰明月照高樓流光正徘徊上有愁
思婦悲歎有餘哀借問歎者誰云是蕩子妻君行踰十
年孤妾常獨棲君若清路塵妾若濁水泥浮沈各異勢
會合何時諧願爲西南風長逝入君懷君懷良不開妾

心將何依 又徐幹室思詩曰人靡不有初想君能終
之別來歷年歲舊恩何可期重新而忘故君子所尤譏
寄身雖在遠豈忘君須臾既厚不爲薄想君時見思

晉陸機擬青青河畔草詩曰靡靡江離草熠熠生河側
皎皎彼姝女婀娜當軒織粲粲嬌容姿灼灼美顏色良
人遊不歸偏棲獨隻翼空房來悲風中夜起歎息 又
擬蘭若生春陽詩曰嘉樹生朝陽凝想封其條執心守
時信歲寒終不凋美人何其曠的的在雲霄 張華情
詩曰北方有佳人端坐鼓鳴琴終晨撫管絃日久不成
音憂來結不解我思存所欽 又曰君居北海陽妾在

江南陰縣邈極修途山川阻且深承歡注隆愛結分投
所欽銜恩守篤義萬里託微心 又詩曰遊目四野外
逍遙獨延佇蘭蕙綠清渠繁華蔭綠渚佳人不在茲取
之欲誰與巢居知寒風穴處知陰雨不曾遠別離安知
慕儔侶 梁簡文帝春宵詩曰花樹含春藜羅帳夜長
空風聲隨篠韻月色與池同綵牋徒自擘無信往雲中
又曉思詩曰晨禽爭學嘯朝花亂欲開爐煙入斗帳
屏風隱鏡臺紅妝幾盡淚蕩子何當來 又冬曉詩曰
冬朝日照梁含怨下前牀帷寒竹葉帶鏡轉菱花光會
是無人見何用早紅妝 又秋閨夜思詩曰非關長信

別詎是良人征九重忽不見萬恨滿心生夕門掩魚鑰
宵牀悲畫屏迴月臨階度吟蟲遶砌鳴初霜隕細葉秋
風吹亂螢故妝猶累日新衣製未成欲知妾不寐城外
搗砧聲 又倡樓怨節詩曰朝日斜來照戶春鳥爭飛
出林片光片影皆麗一聲一轉煎心上林紛紛花落淇
水漠漠苔浮年馳節流易盡何爲忍意含羞 又春別
詩曰別觀蒲萄帶實垂江南豆蔻生連枝無情無意又
如此有心有意徒別離 又詩曰可憐淮水去來潮春
隄楊柳覆河橋淚痕未燥詎終朝行聞玉珮已相要
又詩曰桃紅李白若朝妝羞持憔悴比新芳不惜暫住

君前死愁無西國更生香 又元帝寒閨詩曰烏鵲夜
南飛良人行未歸池水浮明月寒風送搗衣願織迴文
錦因君寄武威 又閨怨詩曰蕩子從遊宦思妾守房
櫳塵鏡朝朝掩寒牀夜夜空若非有懽悅何事久西東
知人相望否淚盡夢啼中 又別詩曰昆明夜月光如
練上林朝花色如霰花朝月夜動春心誰忍相思今不
見 又曰試看機上蛟龍錦還瞻庭裏合歡枝映日通
風影珠幔飄花拂葉度金池不聞離人當重合唯悲合
罷會成離 又曰門前楊柳亂如絲直置佳人不自治
適言新作裂紈詩誰悟今成織素辭 又曰日暮徙倚

渭橋西正見流月與雲齊若使月光無近遠應照離人
今暝啼 又曰別罷花枝不共攀別後書信不相關欲
覓行人寄消息依常潮水暝應還 又曰三月桃花台
面脂五月新油好煎澤莫復臨時不寄人漫道江中無
估客 武陵王蕭紀夜夢詩曰昨夜夢君歸賤妾下鳴
機極知意氣薄不著去時衣故言如夢裏賴得雁書飛
范雲擬古詩曰自君之出矣羅帳咽秋風思君如蔓
草連延不可窮 王僧孺爲人傷近而不見詩曰羸女
鳳凰樓漢姬柏梁殿詎勝仙將死音容猶可見獨我一
心人同鄉不異縣異縣不成隔同鄉更脉脉脉脉如牛

女幽幽寄一語 蕭子顯春別詩曰翻鸞度燕雙比翼
楊柳千條共一色但看陌上攜手歸誰能對此空中憶
又曰幽宮積草自芳菲黃鳥著樹情相依爭風競日
常聞響重花疊葉不通飛當知此時動妾思慙使羅袂
拂君衣 又曰銜悲攬涕別心知桃花李花任風吹本
知人心不似樹何意人別似花離 劉綏閨怨詩曰別
後春池異荷盡欲生冰箱中剪刀冷臺上面脂凝纖腰
轉無力寒衣恐不勝 又秋閨詩曰樓上起秋風絕望
秋閨中燭溜花行滿香然奩欲空徒交兩行淚俱浮妝
上紅 吳均閨怨詩曰胡笳屢悽斷征蓬未肯還妾坐

江之介君戍小長安相去三千里參差書信難四時無
人見誰復重羅紈 又曰春草可攬結妾心正斷絕綠
鬢愁中改紅顏啼裏滅非獨淚如珠亦見珠如血願爲
飛鵠鏡翩翩照離別 又古意詩曰賤妾思不堪採桑
渭城南帶滅連枝繡髮亂鳳凰簪花舞依長薄鵝飛愛
綠潭無由報君信流涕向春蠶 庾肩吾春宵詩曰征
人別來久年芳復臨牖燭下夜縫衣春寒偏著手願及
歸飛雁因書向高柳 又冬曉詩曰鄰雞聲已傳愁人
竟不眠月光侵曙後霜明落曉前繁鬢起照鏡誰忍插
花鈿 劉孝綽春宵詩曰春宵猶自長春心非一傷月

帶園樓影風飄花樹香誰能對雙燕暝暝守空牀 又
冬曉詩曰冬曉風正寒偏念客衣單臨妝罷鉛黛含淚
剪綾紈寄語龍城下詎知書信難 又古意詩曰燕趙
多佳麗白日照紅妝蕩子十年別羅衣雙帶長春樓怨
難守玉堦悲自傷對此歸飛燕銜泥繞曲房差池入綺
幕上下傍雕梁故居猶可念故人安可忘徒然顧枕席
誰與同衣裳空使蘭膏夜炯炯對繁霜 何遜閨怨詩
曰曉河沒高棟斜月半空庭窓中度落葉簾外隔飛螢
含情下翠帳掩涕閉金屏昔期今未反春草寒復青思
君無轉易何異北辰星 又詠倡婦詩曰曖曖高樓暮

華燭帳前明羅帷雀釵影寶瑟鳳雛聲夜花枝上發新
月霧中生誰念當窓牖相望獨盈盈 劉孝儀閨怨詩
曰本無金屋寵長作玉階悲一乖西北麗寧復城南期
永巷愁無歇應門閉有時空勞織素巧徒爲團扇詞匡
牀終不共何由橫自私 劉孝威冬曉詩曰妾家邊洛
城慣識曉鐘聲鐘聲猶未盡漢使報應行天寒硯水凍
心悲詩不成 劉孝先春宵詩曰夜樓明月弦露下百
花鮮情多意不設啼罷未歸眠燉煌定若遠一信動經
年 又冬曉詩曰晨霞影翠帷思婦織霜絲經寒牽杼
澀釧冷調梭遲乍廢倡樓粉貪赴遠人期 王筠閨情

詩日月出宵將半星流曉未央空闈易成響虛室自生
光嬌羞悅人夢猶言君在傍 又向曉闈情詩曰北斗
行欲沒東方稍已晞晨雞初下樓曉露上霑衣衾裯徒
有設信誓果相違詎忍開朝鏡羞恨掩空扉 又春遊
詩曰叢蘭已飛蝶楊柳半藏鴉物色相煎蕩微步出東
家既同翡翠翼復如桃李花欲以千金笑迴君流水車
陸罩詩曰自憐斷帶日偏恨分釵時留步惜餘影含
意結愁眉徒知今異昔空使怨成思欲以別離意獨向
薜蘿悲 鮑泉寒闈詩曰行人消息斷空闈靜復寒風
急朝機燥鏡暗晚妝難從來腰自小衣帶就中寬 鄧

鏗闈怨詩曰暫別猶添恨何忍別經時叢桂頻銷葉庭
樹幾攀枝君言妾貌改妾畏君心移終須一相見併得
兩心知 又月夜闈中詩曰闈中日已暮樓上月初華
樹陰緣砌上窓影面牀斜開屏爲密畫卷帳照垂花誰
能當此夕獨處類倡家 蕭子暉春宵詩曰夜夜妾偏
棲百花含露低蟲聲繞春岸月色思空闈倩語長安驛
辛苦寄遼西 又冬曉詩曰步欄光欲通曙鳥向西東
燭滅傳餘氣帷香開曉風繁花無處盡還銷寒鏡中
劉邈秋闈詩曰螢飛綺窓外妾思霍將軍燈前量獸錦
簷下織花紋墜露如輕雨長河似薄雲秋還百種事衣

成不暇薰 蕭子雲春思詩曰春風蕩羅帳餘花落鏡
奩池荷正捲葉庭柳復垂簷竹柏君自改團扇妾方嫌
詎能憐故素終爲泣新練 何思澄古意詩曰故交不
可忘猶如蘭桂芳新知雖可悅不異茱萸香妾有鳳皇
曲非無陌上桑薦君君不御抱瑟自悲涼 朱越賦得
蕩子行未歸詩曰坐樓愁出望息意不思春無奈園中
柳寒時已報人捉梳羞理鬢挑朱懶向唇何當上路晚
風吹還騎塵 陳陰鏗南征閨怨詩曰湘水舊言深征
客理難尋獨愁無處道長宵不自禁逢人憎解佩從來
懶聽音唯當有夜鵲南飛似妾心 又秋閨怨詩曰獨

眠雖已慣秋來只自愁火籠恒煖脚行障鎮牀頭眉含
黛俱斂啼將粉共流誰能無限別唯守一空樓 李爽
山家閨怨詩曰山中多早梅荆扉達曙開竹巾君自折
荷衣誰爲裁行雲無處所人住在陽臺 張正見山家
閨怨詩曰王孫春好遊雲鬢不勝愁離鴻暫罷曲別路
已經秋山中桂花晚勿爲俗人留 又賦得佳期竟不
歸詩曰良人萬里向河源倡婦三秋思柳園路遠寄詩
空織錦宵長夢反欲驚魂飛蛾屢繞帷前燭衰草還侵
階上玉銜啼拂鏡不成妝促柱繁絃還亂曲時忿年移
竟不歸偏憎寒急夜縫衣流螢映月明空帳疎月從風

入斷機自對孤鸞向影絕終無一雁帶書飛 江總賦
得空閨怨詩曰蕩妻怨獨守盧姬傷獨居瑟上調絃落
機中織素餘自羞淚無燥翻覺夢成虛復嗟長信閣寂
寂往來疎 又爲姬人怨服散詩曰天寒海水慣相知
空牀明月不相宜庭中芳桂憔悴葉井上疎桐零落枝
寒燈作花羞夜短霜雁多情恒結伴非爲隴水望秦川
直置思君腸自斷薄命夫婿好神仙逆愁高飛向紫煙
金丹欲成猶百鍊玉酒新熟幾千年妾家邯鄲好輕薄
特忿仙童一丸藥自悲行處綠苔生何悟啼多紅粉落
莫輕小婦狎春風羅襪也得步河宮雲車欲駕應相代

羽衣未去幸須同不學蕭史還樓上曾逐姮娥戲月中
又閨怨詩曰寂寂青樓大道邊紛紛白雪綺窓前池
上鴛鴦不獨自帳中蘇合還空然屏風有意障明月燈
火無情照獨眠遼西水凍春風少薊北鴻來路幾千願
君關山及早度念妾桃李片時妍 又曰蜘蛛作絲滿
帳中芳草結葉當行路紅臉脈脈一生啼黃鳥飛飛有
時度故人雖故昔經新新人雖新復應故 **增**唐沈佺
期古意詩曰盧家少婦鬱金堂海燕雙棲玳瑁梁九月
寒砧催木葉十年征戍憶遼陽白狼河北音書斷元菟
城南秋夜長誰爲含愁獨不見更教明月照流黃 劉

古香齋詩集卷之三
卷之三
三
廷芝搵衣篇曰秋天瑟瑟夜漫漫夜白風清玉露溥燕
山遊子衣裳薄秦地佳人閨閣寒欲向樓中縈楚練還
來機上裂齊紈攬紅袖兮愁徒倚盼青砧兮悵盤桓盤
桓徙倚夜已久螢火雙飛入簾牖西北風來吹細腰東
南月上浮纖手此時秋月可憐明此時秋風別有情君
看月下參差影爲聽莎間斷續聲絳河轉兮青雲曉飛
鳥鳴兮行人少攢眉緝縷思紛紛對影穿針魂悄悄聞
道還家未有期誰憐登隴不勝悲夢見形容亦舊日爲
許裁縫改昔時緘書遠寄交河曲須及明年春草綠莫
言衣上有斑斑只爲思君淚相續 又晚春詩曰佳人

眠洞房回首見垂楊寒盡鴛鴦被春生玳瑁牀庭陰幕
青藹簾影散紅芳寄語同心伴迎春且薄妝 郭振子
夜春歌曰陌頭楊柳枝已被春風吹妾心正斷絕君懷
那得知 張九齡賦得自君之出矣詩曰自君之出矣
不復理殘機思君如滿月夜夜減清輝 金昌緒春怨
詩曰打起黃鶯兒莫教枝上啼啼時驚妾夢不得到遼
西 王維早春行詩曰紫梅發初遍黃鳥歌猶澀誰家
折楊女弄春如不及愛水看妝坐羞人映花立香畏風
吹散衣愁露霑濕玉闥青門裏日落香車入游衍益相
思含啼向綵帷憶君常入夢歸晚更生疑不及紅襟燕

古香齋詩集卷之三
雙棲綠草時 又羽林騎閨人詩曰秋月臨高城城中
管絃思離人堂上愁稚子堦前戲出門復映戶望望青
絲騎行人過欲盡狂夫終不至左右寂無言相看共垂
淚 又閨人贈遠詩曰啼鶯綠樹深語燕雕梁晚不省
出門行沙場知近遠 又晚春閨思詩曰新妝可憐色
落日捲羅帷鑪氣清珍簟牆陰上玉墀春蟲飛網戶暮
雀隱花枝向晚多愁思閒窓桃李時 王諶閨情詩曰
日暮裁縫歇深嫌氣力微纔能收篋笥懶起下簾帷怨
坐空然燭愁眠不解衣昨來頻夢見夫堦莫應知 王
昌齡閨怨詩曰閨中少婦不知愁春日凝妝上翠樓忽

見陌頭楊柳色悔教夫婿覓封侯 崔國輔古意詩曰
紅荷楚水曲彪炳爍晨霞未得兩回摘秋風吹却花時
芳不待妾玉佩無處誇悔不盛年時嫁與青樓家 李
白春思詩曰燕草如碧絲秦桑低綠枝當君懷歸日是
妾斷腸時春風不相識何事入羅帷 又望夫山詩曰
顛望臨碧空怨情感離別江草不知愁巖花但爭發雲
山萬重隔音信千里絕春去秋復來相思幾時歇 又
烏夜啼詩曰黃雲城邊烏欲棲歸飛啞啞枝上啼機中
織錦秦川女碧紗如煙隔窓語停梭悵然憶遠人獨宿
空房淚如雨 又怨情詩曰美人捲珠簾深坐頓蛾眉

但見淚痕濕不知心恨誰 杜甫搗衣詩曰亦知戍不
返秋至拭清砧已近苦寒月況經長別心寧辭搗衣倦
一寄塞垣深用盡閨中力君聽空外音 薛維翰古歌
曰美人閉紅燭獨坐裁新錦頻放剪刀聲夜寒知未寢
又春女怨詩曰白玉堂前一樹梅今朝忽見數花開
兒家門戶重重閉春色因何入得來 又怨歌曰百尺
珠樓臨狹斜新妝能唱美人車皆言賤妾紅顏好要自
狂夫不憶家 朱琳開緘怨詩曰夫婿邊庭久幽閨恨
幾重玉琴知別日金鏡識愁容懶寄雲中服慵開海上
封年年得衣慣且試莫裁縫 韋應物擬閨人詩曰黃

鳥何關關幽蘭亦靡靡此時深閨婦日照紗窓裏娟娟
雙青蛾微微啓玉齒自惜桃李年誤身遊俠子無事久
離別不知今生死 張仲素秋閨怨詩曰碧窓斜月藹
深輝愁聽寒螿淚濕衣夢裏分明見關塞不知何路向
金微 孟郊古怨詩曰試妾與君淚兩處滴池水看取
芙蓉花今年爲誰死 李廓雞鳴曲曰星稀月沒入五
更膠膠角角雞初鳴征人牽馬出門立辭妾欲向安西
行再鳴引頸簷頭下月中角聲催上馬纔分地色第三
鳴旌旆紅塵已出城婦人上城亂招手夫婿不聞遙哭
聲長恨雞鳴別時苦不遣雞棲近窓戶 朱絳春女怨

詩曰獨坐紗窓刺繡遲紫荊花下嘯黃鸝欲知無限傷
春意盡在停針不語時 王駕古意詩曰夫戍蕭關妾
在吳西風吹妾妾憂夫一行書信千行淚寒到君邊衣
到無 施肩吾望夫詞曰手熱寒燈向影頻迴文機上
暗生塵自家夫壻無消息却恨橋頭賣卜人 杜牧閨
情詩曰娟娟却月眉新鬢學鴉飛暗砌勻檀粉晴窓畫
夾衣袖紅垂寂寞眉黛斂依稀還向長陵去今宵歸不
歸 又偶題詩曰有恨秋來極無端別後知夜闌終耿
耿明發竟遲遲信已憑鴻去歸唯與燕期只應明月見
千里兩相思 又春思詩曰豈君心的的嗟我淚涓涓

綿羽啼來久錦鱗書未傳獸爐凝冷艷羅幕蔽晴煙自
是求佳夢何須訝晝眠 又秋日偶題詩曰荷花兼柳
葉彼此不勝秋玉露滴初泣金風吹更愁綠眉甘棄墜
紅臉恨飄流歎息是遊子少年還白頭 又秋夢詩曰
寒空動高吹月色滿清砧殘夢夜魂斷美人邊思深孤
鴻秋出塞一葉暗辭林又寄征衣去迢迢天外心 又
閨情詩曰梧桐葉落雁初歸迢遞無因寄遠衣月照石
泉金點冷鳳酣簫管玉聲微佳人力杵秋風外蕩子從
征夢寐稀遙望戍樓天欲曉滿城鼙鼓白雲飛 又秋
感詩曰金風萬里思何盡玉樹一窓秋影寒獨掩柴門

明月下淚流香袂倚欄干 又秋夕詩曰銀燭秋光冷
畫屏輕羅小扇撲流螢天階夜色涼如水卧看牽牛織
女星 李商隱夜意詩曰簾垂暮半捲枕冷被仍香如
何爲相憶魂夢過瀟湘 又閨情詩曰紅露花房白蜜
脾黃蜂紫蝶兩參差春窓一覺風流夢却是同衾不得
知 劉威閨情詩曰山上有山歸不得湘江暮雨鷓鴣
飛靡蕪亦是王孫草莫送春香入客衣 馬戴春思詩
曰初日照楊柳玉樓含翠陰啼春獨鳥思望遠佳人心
幽怨貯瑤瑟韶光凝碧林所思曾不見芳草意空深
李頻春閨怨詩曰紅妝女兒窓下羞畫眉夫婿隴西頭

自怨愁容長照鏡悔教征戍覓封侯 曹鄴長相思詩
曰剪妾身上巾贈郎傷妾神郎車不暫停妾貌寧長春
青天無停雲滄海無停津遣妾空牀夢夜夜隨車輪
劉駕寄遠詩曰雪花豈結子徒滿連理枝嫁與征人妻
不得長相隨去年君點行賤妾是新歸別早見未熟入
夢無定姿悄悄空閨中蛩聲遶羅帷得書喜猶甚況復
見君時 聶夷中起夜來詩曰念遠心如燒不覺中夜
起桃花帶露濕立在月明裏 又雜怨詩曰良人昨日
去明月又不圓別時各有淚零落青樓前 又曰生在
綺羅下豈識漁陽道良人自戍來夜夜夢中到漁陽萬

里遠近於中門限中門逾有時漁陽常在眼 又曰君
淚濕羅巾妾淚滴路塵羅巾今在手日得隨妾身路塵
如煙飛得上君車輪 于濱遼陽行詩曰遼陽在何處
妾欲隨君去義合齊死生本不誇機杼誰能守空閨虛
問遼陽路 邵謁望行人詩曰登樓恐不高及高君已
遠雲行郎卽行雲歸郎不返嗟爲樓上人望望不相見
若作轍中泥不放郎車轉白日下西山望盡妾腸斷
羅鄴春閨詩曰愁坐蘭閨日過遲卷簾巢燕羨雙飛管
絃樓上春應在楊柳橋邊人未歸玉笛豈能留舞態金
河猶自浣戎衣梨花滿院東風急惆悵無言倚錦機

又秋怨詩曰夢斷南窓啼曉鳥新霜昨夜下庭梧不知
簾外如珪月還照邊城到曉無 高駢閨怨詩曰人世
悲歡不可知夫君初破黑山歸如今又獻征南策早晚
催縫帶號衣 陸龜蒙閨怨詩曰白袷行人又遠遊日
斜空上映花樓愁絲墮絮相逢著絆惹春風卒未休
韓偓五更詩曰秋雨五更頭桐竹鳴騷屑却似殘春間
斷送花時節空樓雁一聲遠屏燈半滅繡被擁嬌寒眉
山正愁絕 又寄遠詩曰眉如半月雲如鬢梧桐葉落
敲井闌孤竹亭亭公署寒微霜淒淒客衣單想佳人兮
雲一端夢魂悠悠關山難空牀展轉懷悲酸銅壺漏盡

開金鸞 又青春詩曰眼意心期卒未休暗中終擬約
 秦樓光陰負我難相偶情緒牽人不自由遙夜定嫌香
 蔽膝悶時應弄玉搔頭櫻桃花謝梨花發腸斷青春兩
 處愁 又閨情詩曰輕風滴藥動簾鈎宿酒猶酣懶卸
 頭但覺夜深花有露不知人靜月當樓何郎燭暗誰能
 詠韓壽香銷亦任偷敲折玉釵歌轉咽一聲聲入兩眉
 愁 又半睡詩曰擡照仍嫌瘦更衣又怕寒宵分未歸
 帳半睡待郎看 又春閨二首曰願結交加夢因傾澱
 灑尊醒來情緒惡簾外正黃昏 氤氳帳裏香薄薄睡
 時妝長吁解羅帶怯見上空牀 又閨怨詩曰時光潛

去暗淒涼懶對菱花暈晚妝初拆鞦韆人寂寞後園青
 草任他長 蘇極寄遠詩曰遊子雖惜別一去何時見
 飛鳥猶戀巢萬里亦何遠妾願化為霜日日下河梁若
 能侵鬢色先染薄情郎 又思婦吟曰秋風雁又歸邊
 信一何早攬衣出門望落葉滿長道一從秉箕箒十載
 孤懷抱可堪日日醉籠榮不說思君令人老 杜荀鶴
 春閨怨詩曰朝喜花艷春暮悲花委塵不悲花落早悲
 妾似花身 張泌春夕言懷詩曰風透疎簾月滿庭倚
 闌無事倍傷情煙垂柳帶纖腰軟露滴花房怨臉明愁
 逐野雲銷不盡情隨春浪去難平幽窓謾結相思夢欲

化西園蝶未成 李中春閨詩曰塵昏菱鑑懶修容雙
臉桃花落盡紅玉塞夢歸殘燭在曉鶯窓外轉梧桐一
邊無音信暗消魂茜袖香裙積淚痕海燕歸來門半掩
悠悠花落又黃昏 鍾菱春思詩曰沈沈樓影月當
午冉冉風香花正開芳草迢迢滿南陌王孫何處不歸
來 韋莊閨月詩曰明月照前除煙花蕙蘭濕清風何
處來白露寒蟬急美人情易傷暗上紅樓立欲言無處
言但向姮娥泣 又閨怨詩曰戚戚彼何人明眸炯於
月啼妝曉不乾素面凝香雪良人去淄右鏡破金簪折
空藏蘭蕙心不忍琴中說 又春怨詩曰自有春愁自

斷魂不堪芳草思王孫落花寂寂黃昏雨深院無人獨
倚門 黃滔閨怨詩曰妾家五嶺南君戍三城北雁來
雖有書衡陽越不得別久情易料豈在窺翰墨塞上無
煙花寧思妾顏色 崔道融春閨詩曰寒食月明雨落
花香滿泥佳人持錦字無雁寄遼西 又曰欲剪宜春
字春寒入剪刀遼陽在何處莫忘寄征袍 劉兼春怨
詩曰繡林紅岸落花鈿故去新來感自然絕塞杪春悲
漢月長林深夜泣湘絃錦書雁斷應難寄菱鏡鸞孤貌
可憐獨倚畫屏人不會夢魂纔別戍樓邊 又征婦怨
詩曰金閨寂寞罷妝臺玉筯闌干界粉腮花落掩關春

又暮月圓欵枕夢初迴鸞膠豈續愁腸斷龍劍難揮別
緒開曾寄錦書無限意塞鴻何事不歸來 宋寇準江
南春詩曰波渺渺柳依依孤村芳草遠斜日杏花飛江
南春盡離腸斷蘋滿汀洲又未歸 錢惟演艷體詩曰
絳縷初分麝氣濃絃聲不動意潛通圓蟾可見還歸海
媚蝶多驚欲御風執扇寄情雖自潔玉壺盛淚祇疑紅
春窓亦有心知夢未到鳴鐘已旋空 又曰香歇環沈
無限猜春陰濃淡晝簾開有時盤馬看猶嬾盡日投壺
笑未迴蝶怨豈能重傅粉雉嬌疑待更求媒啼妝不治
金翹閨腸斷温郎玉鏡臺 文同春閨詩曰枕席紫春

意窓紗漏晚光蠟蛸傷遠別鷓鴣感流芳妝匣蒸殘粉
熏爐試舊香洞房燈燭外只有夢悠揚 高九萬春情
詩曰天涯海角水雲寬人在吳頭楚尾間彈徹箜篌難
寄恨海棠深院獨憑欄 林景熙商婦吟曰良人滄海
上孤帆渺何如十年音信隔安否不得知長憶相送處
缺月隨我歸月缺有圓夜人去無回期回期倘終有白
首寧怨遲寒蛩苦相弔青燈鑿孤帷妾身不出幃妾夢
萬里馳 裴說寄邊衣詩曰深閨乍冷開香篋玉筍微
微濕紅頰一陣霜風殺柳條濃煙半夜成黃葉重重白
練明如雪獨下閒階轉淒切祇知抱杵搗秋砧不覺高

樓已無月時聞寒雁聲相喚紗窓只有燈相伴幾剪羅
紈又懶裁離腸恐逐金刀斷細想儀形執牙尺回刀剪
破澄江色愁捻金針信手縫惆悵無人試寬窄時時舉
手勻殘淚紅殘漫有千行字書中不盡心中事一半殷
勤託邊使 賀鑄妾春日詩曰獨倚危闌淚滿襟小園
春色懶追尋深思總是丁香結難展芭蕉一寸心 溫
婉寄遠詩曰小花靜院東風起燕燕鶯鶯拂桃李斜倚
紅牆卜遠人樓外春山幾千里 又譚意哥寄外詩曰
瀟湘江上探春回消盡寒冰落盡梅願得兒夫似春色
一年一度一歸來 陸放翁妾偶吟詩曰玉階蟋蟀鬧

清夜金井梧桐辭故枝一枕淒涼眠不得呼燈起作感
秋詩 鄧氏寄衣詩曰欲寄寒衣上帝都連宵裁剪眼
模糊可憐寬窄無人試淚逐西風灑去途 朱淑真春
詞曰屈指清明數日期紛紛紅紫競芳菲池塘水煖鶻
鷁並巷陌風輕燕燕飛柳帶萬條籠淑景游絲千尺舞
晴暉人間何處無春色祇是西樓人未歸 金劉祁征
婦詞曰青燈熒熒照空壁綺窓月上莎雞泣良人塞北
遠從軍獨妾深閨長太息憶初癡小嫁君時謂君早晚
擁旌麾如何十載尚輿隸東屯西戍長奔馳秋風戎馬
臨關路千里持矛關上去公家事急將令嚴兒女私情

古香齋詩集卷之三
三
那得顧恨妾不爲金鞞韞在君腰下隨風埃恨妾不爲
龍泉劍在君手內飛光焰慕君不得逐君行翠袖斑斕
空血染君不見重瞳夙駕遊九疑蒼梧望斷猶不歸況
經沙場征戰地千人同去幾人回君回不回俱未見妾
心如石那可轉 元元好問歸舟怨詩曰渡頭楊柳青
復青閨中少婦動離情只從問得狂夫處夜夜夢到洛
陽城城南吹櫓聲北雁鳴嚶嚶江流望不極相思春草
生 宋无妾薄命詞曰雲母屏珠春冰薄鮫女織綃蟬
翼輕比妾妾薄命比君君薄情紅錦拭鏡照膽明還疑
妾貌非傾城傾城從來有人妬況復君心不如故故人

心尚峰九疑新妾那能無故時補天天不高填海海不
深不食蓮葍不知妾心 又無題詩曰妝淺鬢深凭綺
疏小郎新拜執金吾泣中言語分明怨裊上腰肢準擬
扶翠履鴛寒慵鬪草紅牙馬煖罷樗蒲無人商略心頭
事私向花前卜紫姑 成廷珪夜曲曰芙蓉樓前拜新
月寶鴨微薰透銀葉吳山楚水送遠遊不管閨中照離
別誰家玉鈎飛上天一似連環舊時缺缺多圓少將奈
何方寸愁腸萬里結爲郎白紵裁新衣又恐月圓郎未
歸 陳樵春日閨思詩曰白玉堂前雙燕飛堂中思婦
怨殘暉臂環寄遠青蕪合瓊字題乾白鶴歸醉倚合歡

驚葉暗愁尋豆蔻妬花肥窓間昨日同心錦染罷香絲
不上機 丁鶴年採蓮曲曰採蓮復採蓮下有孤鴛鴦
秋花不結實夜夜守空房 又曰朝採並蒂蓮暮縮同
心結不學綠楊枝含顰送離別 劉仁本戍婦吟曰夫
君在邊戍妾身守孤幃往往備綉櫛不如頻寄衣衣到
恐遲遲不到妾不知欲知衣到未明年鴻雁歸 黃伯
暘香奩曲曰下堦拜新月空庭夜如水相思隔千里未
有團圓意 明劉基閨詞曰戎馬關山隔空閨鬢髮華
將何寄消息江樹總無花 又曰剔却燈花蕊從教汚
翠鈿幾回虛報喜誤妾不成眠 張憲房中思詩曰紅

象作小梳髻龍盤漆髮香泥搗守宮染透桃花骨白馬
不歸來倚牀弄紅拂桂陰綠團圓坐對玲瓏月 陳秀
民製衣詞曰妾把春蠶絲動向寒窓織織成鴛鴦紋洗
花染春色誰知裁剪時爲郎三歎息郎身別已久長短
今未識聊將夢中見彷彿試刀尺霜天萬里途特寄淚
沾臆願郎衣著時細看針線迹 又秋閨詩曰華月初
生夜高樓獨倚時天長人去遠秋半雁來遲寶瑟淒涼
調銀箋宛轉詞應知愁似海不解鬢成絲 高啓春夜
詞曰杏煙濕鬢鞦干下銀蠟光寒曲屏畫數漏閒過每
睡時月明微見墮游絲欲歸自踏娉婷影風動玉釵花

亦冷屋貯嬌愁鎖幔紗青絲嘶騎醉誰家管絃不動空
臺榭夢與烏衣語中夜 揭軌秋思詩曰綺窓紅燭淡
秋光鳳帳流蘇滅夕香機杼隔花閒翠戶輓轡臨水凍
銀牀秋風紫塞書千里夜月清砧淚數行望斷金鞍秋
又杪芙蓉冷落玉池霜 孫賈閨中聞子規詩曰交疏
日射房櫳曉碧樹初聞子規鳥驚回殘夢了無歡慘切
愁聲破清悄獨宿何曾下繡帷寧勞勸我不如歸鶯花
爛熳江南道好向遊人醉處啼 又秋閨詩曰涼夜蕭
蕭處處過玉樓高起逼天河西風瘦盡梧桐葉添得西
窓月影多 又日夜漏沈沈似歲長小鬟貪睡懶添香

春風莫撼流蘇帳待妾分明夢一場 胡儼遠將歸詩
曰去年與郎別楊柳飛白雪今年候郎歸楊柳綠依依
聞郎買船下湘渚日日門前望行人過盡乳鴉啼
徘徊日暮空延佇攬衣回洞房對鏡下新妝那知清漏
短但愛明月月光照席涼於水帳裏燈花撒紅蕊好
事從來不浪傳明日升堂報姑喜 于謙秋閨詩曰深
閨夜勝年刀尺如冰冷縫紉不成眠輓轡響金井 袁
宗曉寒詩曰秋江夜雨芙蓉老翡翠雙飛下紅蓼鯉魚
風起鴻雁悲徹骨清寒夢魂杳碧紗如煙隔啼鳥龜甲
屏風香篆小阿侯白馬不歸來被冷鴛鴦洞房曉 夏

寅春夜詩曰寶鴨煙消幾縷香月移花影過長廊春情
一種無聊賴自起燒燈照海棠 又劉溥相思曲曰相
別誰知許久相思不道能深一夜五更妾夢千山萬水
郎心 蕭韶藥名閨情詩曰菟絲曾附女蘿枝分手車
前又幾時羞折紅花簪鳳髻懶將青黛掃蛾眉丁香漫
比愁腸結豆蔻常含別淚垂願學雲中雙石燕庭烏頭
白竟何遲 一 天門冬日曉蒼涼落葉愁驚滿地黃清淚
暗消紅粉面凝塵閒鎖鬱金裳石蓮未嚼心先苦紅豆
相看恨更長鏡裏孤鸞甘遂死引年何用覓昌陽 二 錢
遂闈思詩曰望斷傷春眼湘簾懶上鈎落花深院靜鸚

鵲對人愁 金誠閨情詩曰欲剪紅霞作舞衣薄雲涼
霧共霏霏玉簫吹冷天邊月只待乘鸞子晉歸 張泰
春寒詩曰鞦韆索上顛風生儂家小院寒輕輕柳眼低
徊曉凝碧花顏欲破春無情半捲珠簾羅袖薄芳塵如
繡窓間落安得巫山十二屏飛入瑤臺護香幕 石珣
長相思詩曰長相思長且深暮雲湘水愁陰陰海棠庭
院燕雙語惱亂無人知妾心妾登池上樓淚滴池中水
水聲活活向東流妾淚將心千萬里 又閨怨詩曰當
年人對月共說兩團圓如何人不見明月又今年 魏
時敏閨思詩曰別後衡門鎖不開年年春雨長莓苔東

風似欲添離恨故引雙雙燕子來 又征婦怨詩曰聞
說沙場雪未乾移師又欲向樓蘭憑誰爲借東風力吹
轉三邊地不寒 祝允明宮閨詩曰十五事君王三十
色未接離篠空近羊蕩蘼不集蝶昔慚鴟夷汎今免呼
韓挾天天東鄰子看星誦桃葉塗黃斷橫雲流紅漬團
靨金微幾千里一夜去來疊 程誥春閨詩曰畫樓紅
燭黃昏思婦啼春淚痕楊柳輕煙別院梨花細雨重門
戴銑閨情詩曰春眠初起驪殘妝倚倦雕闌謾自傷
那得落花隨水去爲儂傳恨與劉郎 楊用修繼室黃
氏寄夫詩曰雁飛曾不到衡陽錦字何由寄永昌三春

花柳妾薄命六詔風煙君斷腸曰歸曰歸愁歲暮其雨
其雨怨朝陽相聞空有刀環約何日金雞下夜郎 葉
正甫妻鎰氏詩曰不隨織女渡銀河每到秋來幾度歌
歲歲爲君身上服絲絲是妾手中梭剪刀未動心先碎
針線纒縫淚已多長短只依元式樣不知肥瘦近如何
增賦梁元帝蕩婦秋思賦曰蕩子之別十年倡婦之居
自憐登樓一望惟見遠樹含煙平原如此不知道路幾
千天與水兮相逼山與雲兮共色山則蒼蒼入漢水則
涓涓不測誰復堪見鳥飛悲鳴隻翼秋何月而不清月
何秋而不明況乃倡樓蕩婦對此傷情於時露萎庭蕙

霜封堦砌坐視帶長轉看腰細重以秋水文波秋雲似
羅日黯黯而將暮風騷騷而渡河妾怨迴文之錦君思
出塞之歌相思相望路遠如何鬢飄蓬而漸亂心懷愁
而轉歎愁縈翠眉斂啼多紅粉漫已矣哉秋風起兮秋
葉飛春花落兮春日暉春日遲遲猶可至客子行行終
不歸 又江淹倡婦自悲賦曰日自趙東來舞漢宮瑤
席金陳桂枝嬌春素璧翠樓明月徒秋歌聲忽散倡人
復愁君王更衣露色未晞侍青鸞以雲徙夾丹輦以霞
飛願南山之無隳指壽陵以同歸俄而綠衣坐奮白華
臥進屑骨不憐抵金誰恡九重以閉高門自蕪青苔積

兮銀閣澀網羅生兮玉梯虛度九冬而廓處經十秋而
分居傷營魄之已盡畏松柏之無餘去柏梁以掩袂出
桂柱而斂眉視朱殿以再暮撫巔華而一疑 周庾信
蕩子賦曰蕩子辛苦逐征行直守長城千里城隴水恒
冰合關山唯明月況復空牀起怨倡婦生離紗窓獨掩
羅帳長垂新箏不弄長笛羞吹常年桂苑昔日蘭闥羅
敷總髮弄玉初笄新歌子夜舊舞前溪別後關情無復
情奩前明鏡不須明合歡無信寄迴文織未成游塵滿
牀不用拂細草橫階隨意生前日漢使著章臺聞道夫
婿定應迴手巾還欲燥愁眉卽刺開逆想行人至迎前

白香齋新刻袖珍淵鑑類函卷三十三
合笑來

古香齋新刻袖珍淵鑑類函卷三百六十三

古香齋新刻袖珍淵鑑類函卷二百六十四

人部二十三 哀傷

哀傷一

原詩曰我心憂傷惄焉如擣 禮記曰墟墓之間未施
哀于民而民哀 又曰知生者弔知死者傷 又曰傷
哉貧也生無以為養死無以為禮 焦贛易林曰秋風
生哀華落悲心 文子曰九夷八狄之哭異聲而皆哀
泰州記曰隴西郡有隴山山東人升此而顧瞻者莫
不悲思哀傷

哀傷二

原詩序曰日月衛莊姜傷已也遭州吁之難傷已不見
答于先君以至困窮 說苑曰鮑叔死管仲舉上衽而
哭之泣下如雨從者曰非君臣父子也管仲曰生我者
父母知我者鮑子也士為知己者死而况為哀乎 左
傳曰魯襄仲殺公子惡及視而立宣公夫人姜氏歸于
齊哭而過市曰天乎仲為不道殺嫡立庶市人皆哭魯
人謂之哀姜 又曰秦不哀我喪而滅我同姓 禮記
曰陽門之介夫死而司城子罕哭之哀而民說 又曰
孔子過泰山側有婦人哭于墓者而哀夫子使子路問
之對曰昔吾舅死于虎吾夫又死焉今吾子又死焉

又曰孔子過衛遇舊館人之喪夫子入哭之出使子貢
脫驂而賻之曰予向者入而哭之遇于一哀而出涕
琴操曰孔子遊于泰山見薪者哭甚哀孔子問之薪者
曰吾自傷故哀耳 家語曰閔子騫三年喪畢見于孔
子與之琴使之絃切切而悲孔子曰君子也哀未盡能
斷之以禮 列子曰燕人生長于楚及老而還本國過
晉國同行者誑之指城曰此燕國之城其人愀然變容
指社曰此君里之社乃喟然而歎指舍曰此君先人之
廬乃潛然而泣指隴曰此君先人之塚其人哭不自禁
吳志曰呂岱親愛徐原原性忠壯好直言及原死哭

之甚哀曰益友不幸岱復于何聞過 王隱晉書曰庾
衮兒子翕卒衮既哀其孤又痛其成人而未娶撫柩而
號每哭聽者皆泣人不哀其喪感其哀也 又曰阮籍
鄰家女未嫁而死籍往哭之甚哀 **增**通鑑曰程顥卒
楊時設位哭寢門而以情赴告同學者一時士大夫識
與不識莫不哀傷 元列傳曰王結卒公卿唁于朝士
大夫弔于家曰正人亡矣

哀傷三

增哀顛 辛酸 書以哀顛天哀號呼天 惆悵 悲涼
也 文選悽淚辛酸 文選悽淚辛酸 文選悽淚辛酸
文選心惆悵而哀離 韻府悲涼見此心 慨息 懊伊息 又含哀懊伊

內悲 填膺 飲恨 文選悲來填膺 又飲恨吞聲
也 潛惻愴悽悲傷之意 哀楚酸辛皆 替惻 酸辛 文
悲慘也臨腸多哀楚悽愴懷酸辛 掩噎 噓唏 韻
忽驚薤露曲掩噎東山雲注悲 弔影慙魂 含酸茹
愁歎也 又曰噓唏哀歎貌 歎 文選朝行弔其影夜寢慙其魂
歎皆自怨傷意也 又含酸茹歎

哀傷四

增悲纏 謂悲哀之情 纏繞于心也 擗標 擗心
八哀 杜甫 慘毒 藝文念當隔山河執 辛楚 文選慙
楚 憤懣 文選憤懣 歎之盛

哀傷五

原詩魏阮瑀七哀詩曰丁年難再遇富貴不重來良時

忽一過身體爲土灰冥冥九泉室漫漫長夜臺身盡氣
力索精魂靡所迴嘉穀設不御旨酒盈觴杯出壙望故
鄉但見蒿與萊 又詩曰臨川多悲風秋日苦清涼客
子易爲戚感此用哀傷攬衣久躑躅上觀心與房三星
守故次明月未收光雞鳴當何時朝晨尚未央還坐長
歎息憂憂難可忘 魏王粲七哀詩曰西京亂無象豺
虎方遘患復棄中國去遠身適荆蠻親戚向我悲朋友
追相攀出門無所見白骨蔽平原南登灞陵岸迴首望
長安悟彼下泉人喟然傷心肝 又詩曰荆蠻非我鄉
何人久滯淫方舟遡大江日暮愁我心山岡有餘映巖

阿增重陰流波激清響猴猿臨岸吟獨夜不能寐攝衣
起撫琴絲桐感人情爲我發悲音 晉張載七哀詩曰
秋風吐商氣蕭瑟掃前林陽鳥收和響寒蟬無餘音朱
光馳北陸浮景想西沈顧望無所見唯覩松柏陰肅肅
高桐枝翩翩孤棲禽仰聽離鴻鳴俯聞蜻蛚吟哀人易
感傷覽物增悲心 潘岳哀詩曰灌如葉落樹邈若雨
絕天雨絕有歸雲葉落何時連山氣冒岡嶺長風鼓松
栢堂虛聞鳥聲室暗知日夕晝愁奄逮昏夜思忽終昔
展轉獨悲窮泣下霑枕席人居天地間飄若遠行客先
後詎能幾誰能斲金石 宋顏延之辭難潮溝詩曰徘徊

徊春郊甸俯仰引單襟一塗苟不豫百慮畢來侵永懷
交在昔有願譽瑟琴寫言勞者事將用慰亡簪 齊謝
朓銅爵臺妓詩曰總帷飄井幹尊酒若平生鬱鬱西陵
樹詎聞歌吹聲芳襟染淚跡嬋娟空復情玉座猶寂寞
况乃妾身輕 梁簡文帝傷美人詩曰昔聞倡女別蕩
子無歸期今似陳王歎流風難重思翠帶留餘結苔階
沒故基圖形更非是夢見反成疑薰鑪含好氣庭樹吐
華滋香燒日有歇花落無還時 沈約丞相第詣世子
車中作詩曰廉公失權勢門館有虛盈貴賤猶如此况
乃曲池平高車塵未滅珠履故餘聲賓階綠錢滿客位

紫苔生何當九原上鬱鬱望佳城

增又悼亡詩曰去

秋三五月今秋還照梁今春蘭蕙草來春復吐芳悲哉
人道異一謝永銷亡簾屏既毀撤帷席更施張遊塵掩
虛座孤帳覆空牀萬事無不盡徒令存者傷 又傷王
融詩曰元長秉奇調弱冠慕前踪眷言懷祖武一簣望
成峰塗艱行易跌命舛志難逢折風落迅羽流恨滿青
松 何胥傷章公大將軍詩曰百萬橫行罷三千白日
新短簫應出塞長笛反驚鄰槐庭慘芳樹舞閣思陽春
所悲金谷妓坐望玉關人 **原**梁蕭子範入元襄王第
詩曰伏軾窺東苑收淚下玉橋昔時方轂處于今共寂

寥夾池猶裊裊仙榭尚迢迢一同西靡栢徒思芳樹蕭

王筠和蕭子範八元襄王第詩曰昔入睢陽苑連步

披風雲今遊故臺處迴望闐無人皓壁留餘篆蕙圃有

餘芬行人皆隕涕何獨孟嘗君 何遜行經范僕射故

宅詩曰旅葵應蔓井荒藤已上扉寂寂空郊暮無復車

馬歸激灑故池水蒼茫落日暉闐寂今如此行客盡霑

衣 又銅爵臺妓詩曰秋風木葉落蕭瑟絃管清望陵

歌對酒向帳舞空城寂寂檐宇曠飄飄帷幔輕曲終相

顧起日暮松栢聲 劉孝綽銅爵臺妓詩曰爵臺三五

日歌吹似佳期定對西陵晚松風飄素帷危絃斷更接

心傷于此時何言留客袂翻掩望陵悲 劉孝威過康

王第宅詩曰入梁逢故苑渡薛見餘宮尚識招賢閣猶

懷愛土風靈光一超遠行館復朦朧洞門餘舊色甘棠

留昔叢送禽悲不去過客慕難窮 庾肩吾亂後經吳

郵亭詩曰郵亭一迴望風塵千里昏青袍異春草白馬

卽吳門獯戎梗伊洛雜種亂輾轉輦道同關塞王城似

太原休明鼎尚重秉禮國猶存殷牖爰雖隳堯城吏轉

尊泣血悲東走橫戈念北奔方憑七廟略誓雪五陵冤

人事今如此天道共誰論 周庾信傷周處士詩曰冥

漠爾遊岱悽涼予向秦誰言異生死同是不歸人悵然

張仲蔚悲哉鄭子真三山猶有鶴五柳更應春遂令從
渭水投釣往江濱 **增**又傷王司徒褒詩曰昔聞王子

晉輕舉逐神仙謂言君積善還得嗣前賢四海皆流寓
非爲獨播遷豈意中台裂君當風燭前茂陵忽移病淮
陽實未痊侍醫愈默默神理遂綿綿永別張平子長埋
王仲宣栢谷移松樹陽陵買墓田陝路秋風起寒堂已
颯焉邱楊一搖落山火卽時燃昔爲人所羨今爲人所
憐世途日復日人情元又元故人傷此別留恨滿秦川
薛德音悼亡詩口鳳樓簫曲斷桂帳瑟絃空畫梁纔
照日銀燭已隨風苔生履跡處花沒鏡塵中唯餘長簞

月永夜何朦朧 陳張正見銅雀臺詩曰荒涼銅雀晚

搖落墓田通雲慘當歌日松吟欲舞風人疏瑤席冷曲
罷總帷空可惜年將淚俱盡望陵中 又傷韋侍讀詩

曰懷經侍北海蘊義盛西河高風落廻照逝水役驚波
柳下悲風急山陽秋氣多宿草摧書帶寒松脆女蘿無
復華陰市空餘蒿里歌 **原**又傷顧野王詩曰獨酌一

樽酒高咏七哀詩何言蒿里別非復竹林期階荒鄭公
草戶闐董生帷人隨暮槿落客共晚鶯悲年髮兩如此
傷心獨幾時 又和張源傷往詩曰小婦當壚夜夫婿
凱師年正歌千里曲翻入九重泉機中未斷素瑟上本

留絃空帳臨窓掩孤燈向壁燃還悲塞壘曙松短未生
煙 **增**陰鏗和悼亡詩曰晝梁朝日盡芳樹晚花辭忽
以千金笑長作九泉悲鏡前塵劇粉機上網多絲戶餘
雙入燕牀有一空帷名香不可得詎見反魂時 隋劉
焯傷牛尚書弘詩曰名臣不世出百工之所求况乃非
常器遭逢興運秋佇聞和鼎實行當奉介邱高衢翻稅
駕闕水遽遷舟傳呼更何日曳履聞無由歸魂貌修路
征棹艤邗溝林薄長風慘江上寒雲愁夜臺終不曙遺
芳徒自留 唐孔紹安傷顧學士詩曰迢遞雙嶠道超
忽三川滄此中俱失路思君不可思遊人行變橘逝者

遽焚芝憶昔江湖上同咏子矜詩何言陵谷徙翻驚鄰
笛悲陳根非席卉總帳異書帷與善成空說穢良信在
茲今日嚴夫子哀命不哀時 褚亮傷李少府正巳詩
曰勞息本相循悲歡理自均誰能免長夜惜爾正青春
邁德惟家寶生才諒國珍高文綴翡翠茂學掩麒麟述
作紛無已言談如入神斷腸雖累月分手未盈旬輔嗣
俄長往顏生卽短辰聲華滿昭代形影委窮塵禪草廻
中使生芻引弔賓同遊秘府日方駕直城闈並拜黃圖
右分曹清渭濱風期嵇呂好存沒范張親虛座懷王述
遺篇慟景純精靈與豪翰千祀壽何人 元行恭過故

宅詩曰頽城百戰後荒宅四鄰通將軍樹已折步兵途
轉窮吹臺有山鳥歌庭聒夜蟲草深斜逕滅水盡曲池
空林中送明月是處來春風唯餘一故井尚夾兩株桐
王勃傷裴錄事喪子詩曰蘭階霜候早松露空臺深
魄散珠胎沒芳銷玉樹沈露文晞宿草烟照慘平林焚
芝空歎息流恨滿籬金 駱賓王傷祝阿王明府詩曰
洛川貞氣上重泉惠政融含章光後烈繼武嗣前雄與
善良難驗生涯忽易窮翔鳧猶化履狎雉尚馴童錢滿
荒階綠塵生虛帳紅夏餘將宿草秋近未驚蓬煙晦泉
門閉日盡夜臺空誰堪孤隴外獨聽白楊風 杜審言

代張侍御傷美人詩曰二八泉扉掩帷屏寵愛空淚痕
銷夜燭愁思亂春風巧笑人疑在新妝曲未終尚憐脂
粉氣留著舞衣中 楊炯和曹司功傷姬人詩曰昔時
南浦別鶴怨寶琴絃今日東方至鸞消珠鏡前水流衝
砌咽月影向窓懸妝匣棲餘粉薰爐滅舊煙晚庭吹玉
樹寒帳委金蓮佳人不再得白日幾千年 宋之問傷
曹娘詩曰可憐寂寞去何之獨立丰茸無見期君看水
上芙蓉色恰似生前歌舞時 一前溪妙舞今應盡子夜
新歌遂不傳無復綺羅嬌白日真將珠玉閉黃泉 二又
過史正議宅詩曰舊交此零落雪泣訪遺塵劔杭傳好

事池臺傷故人國香蘭已歇里樹橘猶新不見吳中隱
空餘江海濱 張說過庾信宅詩曰蘭成追宋玉舊宅

寓辭人筆湧江山氣文驕雲雨神包胥非救楚隨會反
留秦獨有東陽守來嗟古樹春 杜甫八哀詩曰恐懼

祿位高悵望王土窄不得見清時嗚呼就窀穸永繫五
湖舟悲甚田橫客千秋汾晉間事與雲水白 王司空

青蠅紛營營風雨秋一葉內省未入朝死淚終映睫大
屋去高棟長城掃遺堞平生白羽扇零落蛟龍匣雅望

與英姿惻愴槐里接三軍晦光彩烈士痛稠疊直筆在
史臣將來洗箱篋吾思哭孤冢南紀阻歸檝扶顛永蕭

條未濟失利涉疲荼竟何人灑淚巴東峽 李司徒 炯

炯一心在沈沈二豎嬰顏回竟短折賈誼徒忠貞飛旄

出江漢孤舟轉荆衡虛無馬融笛悵望龍驤瑩空餘老

賓客身上愧簪纓 鄭國公 川廣不可泝墓久狐兔鄰

宛彼漢中郡文雅見天倫何以開我悲泛舟俱遠津溫

溫昔風味少壯已書紳舊遊已磨滅衰謝多酸辛 汝陽

璣 郡王 長嘯宇宙間高才日淪替古人不可見前輩復誰

繼鐘律儼高懸鯤鯨噴迢遞坡陀青州血蕪沒汶陽瘞

哀贈竟蕭條恩波延揭厲子孫存如綫舊客舟凝滯君

臣尚論兵將帥接燕薊朗咏六公篇 公有張相等五王

伯狄相六公詩

憂來豁蒙蔽秘書監李邕 結交三十年吾與誰遊行滎陽

復冥冥罪罟已橫罟嗚呼子逝日始泰即終蹇長安米

萬錢凋喪盡餘喘戰伐何當解歸帆阻清沔尚纏漳水

疾永負蒿里餞秘書少監蘇源明 天長眺東南秋色餘颺颺

別離慘至今班白徒懷曩春深秦山秀葉墜清渭朗劇

談王侯門野稅林下鞅操紙終夕酣時物集遐想詞場

竟疎闊平昔濫吹獎百年見存沒牢落吾安放故著作郎鄭虔

千秋滄海南名繫朱鳥影歸老守故林戀闕悄延頸

波濤良史筆蕪絕大庾嶺向時禮數隔制作難上請再

讀徐孺碑猶思理烟艇右僕射張九齡 又過陳拾遺故宅詩

日拾遺昔日居大屋尚修椽悠揚荒山日慘澹故園煙

位下曷足傷所貴者聖賢有才繼騷雅哲匠不比肩到

今素壁滑灑翰銀鈎連盛事會一時此堂豈千年終古

立忠義感遇有遺篇 又哀江頭詩曰少陵野老吞聲

哭春日潛行曲江曲江頭宮殿鎖千門細柳新蒲為誰

綠憶昔霓旌下南苑苑中萬物生顏色昭陽殿裏第一

人同輦隨君侍君側輦前才人帶弓箭白馬嚼齧黃金

勒翻身向天仰射雲一箭正墮雙飛翼明眸皓齒今何

在血汚遊魂歸不得清渭東流劒閣深去住彼此無消

息人生有情淚沾臆江水江花豈終極黃昏胡騎塵滿

古香齋詩集卷之四 卷之三
城欲往城南忘城北 又過故斛斯校書莊詩曰此老
已云沒鄰人嗟未休豈無宣室召徒有茂陵求妻子寄
他食林園非昔遊堂空總帷在浙浙野風秋 李白謝
公宅詩曰青山日將暝寂寞謝公宅竹裏無人聲池中
有虛白荒庭衰草遍廢井蒼苔積惟有清風閒時時起
泉石 元結去鄉悲詩曰踟躕古塞關悲歌爲誰長日
行見孤老羸弱相提將聞其呼怨聲聞聲問其方乃言
無患苦豈棄父母鄉非不見其心仁惠誠所望念之何
可說獨立爲悽傷 劉長卿過賈誼宅詩曰三年謫宦
此棲遲萬古唯留楚國悲秋草獨尋人去後寒林空見

日斜時漢文有道恩猶薄湘水無情弔豈知寂寞江山
搖落處憐君何事到天涯 李嘉祐傷歙州陳二使君
詩曰憐君辭病臥滄洲一旦云亡萬事休慈母斷腸妻
獨泣寒雲慘色水空流江村故老長懷惠山路孤猿亦
共愁寂寞荒墳近漁浦野煙朝暮卽千秋 皇甫曾傷
陸處士詩曰從此無期見柴門對雪開二毛逢世難萬
恨掩泉臺返照空堂夕孤城弔客迴漢家偏訪道猶畏
鶴書來 顧況傷大理謝少卿詩曰舊館絕逢迎新詩
何處呈空留封禪草已作岱宗行柳蠹風吹折階崩雪
遶平無因重來此剩哭兩三聲 又傷子詩曰老夫喪

愛子曰暮千行血聲逐斷猿悲路隨飛鳥滅老夫已七十不作多時別 司空曙觀王右丞遺文詩曰舊日相知盡深居獨一身閉門空有雪看竹永無人每許前山隱曾憐陋巷貧題詩今尚在暫爲拂留塵 李益惜春傷詩曰畏老身今老逢春解惜春今年看花伴已少去年人 權德輿過亡友楊校書舊廳詩曰故人隨化往倏忽今六霜及我就拘限清風留此堂松竹愈映鬱芝蘭自銷亡絕絃罷流水聞笛同山陽朗如冰玉姿粲若鸞鳳章欲翥摧勁翮先秋落貞芳正平賦鸚鵡文考頌靈光二子古不弔夫君今何傷黃壚旣杳杳元化亦茫茫

茫茫必恨宿草含淚灑衣裳 衛象傷李端詩曰才子浮生促泉臺此路賒官卑揚執戟年少賈長沙人去門棲鳥災成酒誤虵唯餘封禪草留在茂陵家 元稹傷呂衡州詩曰鵬鶚生難敵沈檀死更香兒童喧巷市羸老哭碑堂雁起沙汀暗雲連海氣黃祝融峰上月幾照北人喪 劉禹錫傷獨孤舍人詩曰昔別公年少今悲喪國華遠來同社鷺不見早梅花 又傷循州渾尚書詩曰貴人淪落路人哀碧水連天丹旆迴遙想長安此時節朱門深巷百花開 又重至衡陽傷柳儀曹詩曰憶昨與故人湘江岸頭別我馬映林嘶君帆轉山滅馬

古詩集卷之四
卷之四
三
嘶循故道帆滅如流電千里江離春故人今不見 又
謫居悼往詩曰悒悒何悒悒長沙地卑濕樓上見春多
花前恨風急猿愁腸斷叫鶴病翹趾立牛衣獨自眠誰
哀仲卿泣 又遙傷邱中丞詩曰鄴下殺才子蒼茫怨
氣凝枯楊映漳水野火上西陵馬鬣今無所龍門昔共
登何人爲弔客唯是有青蠅 孟郊弔李元賓遺字詩
曰零落四五字忽然千萬年那知真寂客不有補遺篇
斜月吐空壁旅人難獨眠一生能幾時萬慮來相煎戚
戚故交淚幽幽長夜泉已矣難重言一言一潸然 又
悼幼子詩曰一閉黃蒿門不聞白日事生氣散成風枯

形化爲地負我千年恩欠爾千行淚灑之北原上豈待
秋風至 王建弔孟東野詩曰哭盡秋天月不明蘭無
香氣鶴無聲自從東野先生死側近雲山得散行 白
居易題于家公主舊宅詩曰平陽舊宅少人遊應是遊
人到卽愁布穀鳥啼桃李院絡絲蟲怨鳳凰樓臺傾滑
石猶殘砌簾動真珠不滿鈎聞道至今蕭史在鬢鬚雪
白向韶州 朱慶餘廢宅詩曰古巷棘門誰舊宅早曾
聞說屬官家更無新燕來巢屋唯有閒人去看花荒殿
欲摧塵滿櫪小池初涸草侵沙榮華事歇多如此立馬
踟躕對日斜 于武陵過侯王故第詩曰過此一酸辛

行人淚有痕獨殘新碧樹猶擁舊朱門歌歇雲初散簷
空燕尚存不知彈鋏客何處感新恩 許渾題江令公
舊宅詩曰身沒南朝宅已荒邑人猶賞舊風光芹根生
葉石池淺桐樹落花春井香帶暖山蜂巢畫閣欲陰溪
燕集書堂閒愁此地更南望潮滿臺城春草長 又傷
湖州李郎中詩曰政成身沒共興衰鄉路兵戈旅櫬迴
城上暮雲凝鼓角海邊春草閉池臺經年未葬佳人散
昨日因齋故吏來南北相逢皆掩淚白蘋洲上一花開
殷陶經杜甫舊宅詩曰浣花溪裏花多處爲憶先生
在蜀時萬古只應留舊宅千金無復換新詩沙崩水檻

鷗飛盡樹壓村橋馬過遲山月不知人事變夜來江上
與誰期 李商隱過伊僕射舊宅詩曰朱邸方酌力戰
功華筵俄歎逝波窮迴廊簾斷燕飛出小閣塵凝人語
空幽砌欲乾殘菊露餘香猶入敗荷風何能更涉龍江
去獨立寒沙弔楚宮 溫庭筠開元中錫宴堂樓臺遺
趾詩曰茲地乃蔓草故墓摧壞牆枯池接斷岸唧唧啼
寒蟬敗荷塌作泥死竹森如槍遊人問老吏相對聊感
傷 又和王秀才傷歌妓詩曰月缺花殘莫愴然花須
終發月終圓更能何事消芳念亦有濃華委逝川一曲
艷歌留宛轉九原春草葬嬋娟王孫莫學多情客自古

多情損少年 又過賀監舊宅詩曰越溪漁客賀知章
任達憐才愛酒狂鷓鴣葦花隨釣艇蛤蜊菰葉夢橫塘
幾年涼月拘華省一宿秋風憶故鄉柴路脫身終自得
福庭回首莫相忘出羣鸞鶴辭遼海落筆龍蛇滿壞牆
李白死來無醉客可憐神彩弔殘陽 又宿亡友李處
士故墅詩曰柳不成絲草帶煙海槎東去鶴歸天愁腸
斷處風何限病眼開時月正圓花若有情還悵望水因
無事莫滯滯終知此恨難消遣辜負南華第二篇 方
干經陸補闕故居詩曰不敢要君徵亦起致君全得似
唐虛籛言昨歎離天聽新塚今聞入縣圖琴鎖壞窓風

自觸鶴歸喬木月難呼學詩弟子人何在檢點猶逢諫
草無 又題故人廢宅詩曰寒莎野樹入荒庭風雨蕭
蕭不掩扇舊徑已知無孟竹前溪應不浸荀星精靈消
散歸寥廓功業傳留在誌銘薄暮停車更悽愴山陽鄰
笛若爲聽 又廢宅詩曰主人何處獨徘徊流水自流
花自開若見故交皆散去卽應新燕不歸來入門繚繞
穿荒竹坐石逡巡染綠苔應是曾經惡風雨修桐半折
損琴材 又經故侯郎中舊居詩曰一朝寂寂與冥冥
壟樹未長墳草青高節雄才向何處夜闌空鎖滿池星
趙嘏經王先生故居詩曰晚波東去海茫茫誰識蓬

山不死鄉弄玉已歸蕭史去碧樓紅樹倚斜陽 又悼
亡詩曰一燭從風到奈何三年衾枕逐風波雖知不得
公然淚時泣闌干恨更多 一明月蕭蕭海上風君歸泉
路我飄蓬門前雖有如花貌爭奈如花心不同 二李羣
玉傷思詩曰八月白露濃芙蓉抱香死紅枯金粉墮寥
落寒塘水西風團葉下疊疊參差起不見棹歌人空垂
綠房子 又傷友詩曰玉棺來九天鳧鳥掩窮泉蕪沒
池塘興淒涼翰墨筵短期存大夢舊好委浮烟我有幽
蘭曲因君遂絕絃 又傷幼女痴兒詩曰哭爾春日短
支頤長歎嗟不如半死樹猶吐一枝花 周絲經故宅

有感詩曰身沒南荒雨露賒朱門空鎖舊繁華池塘鑿
就方通水桃杏栽成未見花異代圖書藏幾篋傾城羅
綺散誰家昔年埏埴生靈地今日生人爲歎嗟 皮曰
休哀隴民詩曰隴山千萬仞鸚鵡巢其巔窮危又極險
其山猶不全蚩蚩隴之民懸度如登天空中覘其巢衆
羽爭紛然百禽不得一十人九死焉隴川有成卒戍卒
亦不閒將命提雕籠直到金臺前彼毛不自珍彼舌不
自言胡爲輕人命奉此玩好端吾聞古聖王珍禽皆捨
旃今此隴民屬無歲啼漣漣 又襄州漢陽王故宅詩
曰碑字依稀廟已荒猶聞耆舊憶賢王園林一半爲他

主山水虛言是故鄉
戟戶野蒿生翠瓦
舞樓樓鶴汗雕梁
柱天功業緣何事
不得終身似霍光
杜荀鶴經廢宅
詩曰人生富貴盛
修德可延之不慮
有今日爭教無破
時薛斑題字壁
花發帶巢枝
何況高原上
荒墳與折碑
張祐感王將軍
柘枝妓沒詩曰
寂寞春風舊柘
枝美人休舞曲
停吹鴛鴦鈿帶
拋何處孔雀羅
衫付阿誰畫鼓
不聞招節拍
錦靴虛想挫腰
支今年座上翻
如醉曾見梨園
教徹時皇甫冉
傷美人詩曰玉
珮石榴裙當年
嫁使君專房獨
見寵傾國衆皆
聞歌舞長無對
幽明忽此分
陽臺千萬里
何處作行雲
李羣玉悼笙妓

詩曰麗質仙姿烟
逐風鳳凰聲斷
吹樓空多情草
色怨還綠無主
杏花春自紅墮
珥尚存芳樹下
餘香漸滅玉堂
中唯應去抱雲
和管從此長歸
阿母宮韋莊悼
亡姬詩曰鳳去
鸞歸不可尋十
洲仙路彩雲深
若無少女花應
老爲有姮娥月
易沈竹葉豈能
消積恨丁香空
解結同心湘江
水闊蒼梧遠何
處相思弄舜琴
一默默無言惻
惻悲閒吟獨傍
菊花籬只今已
作經年別此後
知爲幾歲期開
篋每尋遺念物
倚樓空綴悼亡
詩夜來孤枕空
腸斷窓月斜輝
夢覺時二六七
年來春又秋也
同歡笑也同愁
纔聞及第心先
喜試說求婚淚
便流幾爲

如來頻斂黛每思閒事不梳頭如今悔恨將何益腸斷
千休與萬休三一閉香闥後羅衣盡施僧鼠偷筵上果
蛾撲帳前燈土蝕釵無鳳塵生鏡少菱有時還影響花
葉曳香繒四芳草又芳草故人楊子家青雲容易散白
日等閑斜皓質留殘雪香魂逐斷霞不知何處笛一夜
叫梅花五張喬經費徵君故居詩曰草堂蕪沒後來往
問樵翁斷石荒林外孤墳晚照中數溪分大野九子立
寒空烟壁曾行處青雲路不通 曹松弔建州李員外
詩曰銘旌歸故里猿鳥亦悽然已葬桐江月空廻建水
船客傳爲郡日僧說讀書年恐有吟魂在深山古木邊

羅隱經故翰林張舍人所居詩曰行塵不是昔時塵
謾向朱門憶侍臣一榻已無開眼處九泉應有愛才人
文餘吐鳳當年詔樹想棲鸞舊日春從此深恩更難報
夕陽衰草獨沾巾 又瓊華觀經故友所居詩曰槐花
漠漠向人黃此地追遊跡已荒清論不知蒙叟達死交
空歎趙岐亡病來未忍言閒事老去惟應覓醉鄉日暮
街東策羸馬一聲橫笛似山陽 又清溪江令公宅詩
曰鸞牋象管夜深時曾賦陳宮第一詩讌罷風流人不
見廢來蹤跡草應知鶯憐勝事啼空谷蝶戀餘香舞好
枝還有往年金蕊井牧童樵叟等閒窺 宋寇準晚坐

有感詩曰出門望寒野四顧惟椒坡憶昔楚大夫還此
情如何殘陽半明滅木落西風多因同下蔡恨不覺增
悲歌 歐陽修感興詩曰唧唧復唧唧夜歎曉未息蟲
聲急愈炎病耳聞若刺壯士易爲老良時難再得日月
相隨東天行自南北三者不相謀萬古無窮極安知人
世間歲月忽已易 李覲衰老婦詩曰里中一老婦行
行啼路隅自悼未亡人暮年從二夫寡時十八九嫁時
六十餘昔日遺腹兒今茲垂白鬚子豈不欲養母豈不
願居徭役及下戶財盡無所輸異籍幸可免嫁母乃良
圖牽車送出門急如盜賊驅兒孫孫有婦小大攀且呼

回頭與永訣得死無刑誅我時聞此言爲之長歎吁天
民固有窮鰥寡實其徒吾君務復古旦旦師黃虞赦書
褒節婦許與旌門閩州縣莫能察詔旨徒成虛 又感
秋詩曰徙倚重咨嗟非緣惜歲華關山異鄉客砧杵別
人家天冷雲含日溪清水現沙屈魂終不返悲思更無
涯 宋祁長安道中悵然作曰三輔古風烟征驂悵未
前山園蓬顆外宮室黍離邊樹老經唐日碑殘刻漢年
便須真隕涕不待雍門絃 一興亡作今古事往始堪悲
宮破黃山在城空北斗移走崗寒兔隱啼樹暮鴉饑灞
岸重回首唯餘王粲詩 二梅堯臣秋夜感懷詩曰風葉

相追逐庭響如人行獨宿不成寐起坐心屏營哀哉齊
體人魂氣今何征曾不如隕籜繞樹猶有聲涕淚不能
止月落荒雞鳴 又悼亡詩曰每出身如夢逢人強意
多歸來仍寂寞欲語向誰何窓冷孤螢入宵長一雁過
世間無最苦精爽此銷磨 韓維弔杜少陵墓詩曰三
尺孤墳在空留萬古名風騷誰是主天地大無情入夜
月虛白逢春草自生耒陽江色迴憑弔恨難平 徐積
哀哀詞曰哀哀復哀哀哀哀至此極孤兒與慈母中路
忽相失恍惚須臾間終日不復得誰復坐我堂誰復入
我室誰復飲兒酒誰復哺兒食兒饑復誰念兒寒復誰

恤耳不聞慈語目不見慈色譬如行路人日遠如一日
行人猶可期遠道猶可追天窮地盡處一日猶可歸哀
哀復哀哀此去無盡時誰言生離別不如死別離君不
見人已閉門鳥已棲黃昏塚畔孤兒啼 張耒京師廢
宅詩曰當道朱門白晝扃高堂歌吹久無聲古窓積雨
昏殘晝朽樹輕陰長寄生門下老人時灑掃舊時來客
歎平生艷姬嬌馬知何處獨有庭花春自榮 歐陽澈
秋試下第有感詩曰籬菊金英噴異香杜門岑絕獨持
觴風掀脫葉橫斜舞雲襯平林淺淡黃塞管有情增哽
咽野花無緒伴淒涼不禁景物撩秋眼剩與新篇付錦

囊嚴羽悠悠我行邁詩曰悠悠我行邁邈在天一方
道路無終極時節易炎涼路逢故里親揮泣問我鄉妻
子別離久不知今存亡中原多白骨城邑聚豺狼遠去
無僮僕思還絕餽糧寄語家中人遠行良可傷 文天
祥建康詩曰金陵古會府南渡舊陪京山勢猶盤礴江
流已變更健兒徙幽土新鬼哭臺城一片清溪月偏于
客有情 丁開建業詩曰誰遣淒涼滿眼中黃花渺渺
又秋風龍蹲虎踞江山大馬去牛來社稷空縱有千人
唯諾諾本無百歲更匆匆乾坤顛倒孤身在聊復殘生
伴釣翁 金秦略悼亡詩曰自古生離足感傷爭教死

別便相忘荒坡何處墳三尺老眼他鄉淚數行多事春
風吹夢散無情寒月照更長還家却是清明節忍見堂
空紙挂牆 元元好問哀王仲澤詩曰太學聲華弱冠
馳青雲岐路九霄飛上前論事龍顏喜幕下等邊犬吠
稀壯志相如頭碎柱赤心嵇紹血沾衣從來聖牘褒忠
義誰爲幽魂一發揮 許衡有感詩曰嬌兒未成人病
苦不肯已憂傷動中懷慘慘心欲碎老妻情已惡中夜
泣相對何如早還鄉山陽墳隴在平生所願心展轉不
得遂十年誤同遊回首只多愧病連肝肺深愁覺妻子
累悠悠故鄉情滴滴眼中淚 馬祖常悼亡詩曰燕子

樓空花不開繡簾天晚月初來手痕留在紅牙板猶有
餘香如落梅 朱廷珪悲徐州詩曰彭城八月風塵起
數郡義兵多戰死良家子女復何辜盡作黃河水中鬼
髑髏填海幾時歸千古沈寃無處洗王師一日天上來
賊船夜斫浮橋開守橋將軍不敢敵狂浪倒瀉聲如雷
三山回望平如掌野曠猶聞金鼓響軍中少年當封侯
爭入轅門請功賞江邊老翁死卽休血淚沾巾空白頭
王冕悼王止齋詩曰三月燕山聽子規追思令我淚
垂垂雖然事業能經世可惜衣冠在此時霜慘晴窓琴
獨冷月明秋壁劒雙悲山河萬里人情別回首春風說

向誰 伯顏子中過故居詩曰白頭歸故里荒草沒柴
門鄉舊仍相見兒童誰復存忠清千古事骨肉一家魂
痛哭松楸下雲愁月欲昏 明劉基悲杭城詩曰觀音
渡頭天狗落北關門外塵沙惡健兒被髮走如風女哭
男啼撼城郭憶昔江南十五州錢塘富庶稱第一高門
畫戟擁雄藩艷舞清歌樂終日割臙進酒皆俊郎呵叱
閑人氣驕逸一朝奔迸各西東玉笋金杯散蓬蓽清都
太微天聽高虎略龍韜緘石室長夜風吹血腥入吳山
浙河慘蕭瑟城上陣雲疑不飛獨客無聲淚交臆 王
冕傷亭戶詩曰清晨度東關薄暮曹娥宿草牀未成眠

忽起西鄰哭敲門問野老謂是鹽亭族大兒去采薪投
身歸虎腹小兒出起土衝惡入鬼錄課額日以增官吏
日以酷不爲公所幹惟務私所欲田園供給盡離數屢
不足前夜總催罵昨日塲胥督今朝分運來鞭笞更殘
毒竈下無尺草甕中無粒粟旦夕不可度久世亦何福
夜永聲語冷幽咽向古木天明風啓門僵屍掛荒屋
又悲苦行詩曰悲風吹茅墮空屋老烏號鳴屋上木誰
家男子從遠征父母妻孥相送哭哭聲嗚咽已別離道
旁復對行人悲去者一身事歸者百感隨前年鬻大女
去年賣小兒皆因官稅迫非以饑所爲布衣磨盡草衣

拆一冬幸喜無霜雪今年老小不成羣賦稅未知何所
出昨夜忽驚雷破山比來暴雨如飛湍此時江南正六
月酸風入骨生苦寒東村西村無火色凝雲著地如墨
黑曠翁瞽嫗相喚忙屋漏牀牀眠不得開門不敢大聲
語門外磨牙多猛虎自來住此十世餘古老未嘗懼此
苦我感此情重歎吁不覺淚下沾巾裾安得壯士挽天
河一洗煩鬱清九區坐令爾輩皆安居 張憲銅雀妓
詩曰陵樹日沈西秋風石馬嘶芳樽傾總帳詎肯濕黃
泥慘慘笙歌合遙遙望眼迷玉人腕如草能得幾回啼
魏澤過侯城里有感詩曰筍輿衝雨過侯城撫景依

然感慨生黃鳥向人空百轉清猿墮淚又三聲山中自
可全高節天下難居是盛名却憶令威千載後重歸華
表不勝情 曾棨過劉伶宅詩曰舊宅無人住荒墟有
路岐一生渾是醉萬古復何悲白首銜杯處青山荷鋪
時最憐獨醒者高塚亦纍纍 羅以明感興詩曰勛業
飄零梅子真江山誰與訪遺鹿艱難獨不悲前事慷慨
徒勞憶故人太乙圖書元在漢東周禾黍半歸秦晴天
玉筍秋風上欲薦蘋花淚滿巾 王偁過舊遊有感詩
曰濕雲如醉護輕塵黃蜨東風滿四鄰新綠只疑銷晚
黛落紅猶記掩歌唇舞樓春去空殘日月榭香飄不見

人欲覓梨雲仙夢遠坐令芳沼獨傷神 郭登哀征人

詩曰天迷離水嗚咽戰馬無聲寶刀折冤鬼悽酸啼夜

月青燐熒熒明又滅照見征夫戰時血 張和悼妾詩

曰桃葉歌殘思不勝西風吹淚落紅冰樂天老去風情

減子野歸來感慨增花逐水流春不管雨隨雲散夢難

憑宵來書館寒威重誰送薰香半臂綾 吳寬悼董孟

珍詩曰獨持古道作今人白首我冠稱隱淪垂老不堪

三月病移家空是一生貧篋中書帙悲遺墨窓底碁枰

積素塵深巷東風花自落扣門無復過西鄰 沈周廢

宅行曰長洲苑外連雲宅青粉垣牆高廿尺重樓沓閣

出參差柳絮中間影朱碧堂前暖霞封畫欄淵淵伐鼓
催牡丹行人隔牆空歎息富貴無緣容眼看主人只怕
客不醉白日未昏教火繼歌童揭調塵墮梁舞女失釵
金溜地豪華忌久復忌盈時革人亡一夢驚門前車馬
野花盡地上牛羊無草生老奴髮禿雙足猶戀遺基
葺茅屋半甌羹粥不療饑西風滿面吞聲哭 顧璘傷
歌行曰青春欲去不可留白日欲落花含愁銀鞍白馬
分明別故苑芙蓉傷素秋不惜紅顏坐凋歇可憐君恩
難再得夜簾香銷巫峽雲寒衣淚落秦關雪掩却青銅
鏡不忍生塵埃且留蘭膏燭有心莫成灰風吹蓬枝往

復回去年團扇今年開小物無情尚如此何獨君恩無
去來買賦無黃金挑絲不成錦欲因魂夢逐車輪願君
莫惡珊瑚枕

原賦後漢蘇順歎懷賦曰悲終風之隕籜條枝梢以摧
傷桂敷榮而方盛遭暮冬之隆霜華菲菲之將實中天
零而消亡童烏濬其明哲悲何壽之不长嗟劉生之若
茲奄彌留而永喪 魏王粲傷天賦曰惟皇天之賦命
實浩蕩而不均或老終以長世或昏天而夙泯物雖存
而人亡心惆悵而長慕哀皇天之不惠抱此哀而何愬
求魂神之形影羌幽冥而弗迓淹徘徊以想像心彌結

而紆縈晝忽忽其若昏夜炯炯而至明 晉陸機歎逝
賦曰昔每聞長者追計平生同時親故或共遊一途同
宴一室十年之內索然已盡以是思哀哀可知矣賦曰
悲夫川閣水以成川水滔滔而日度世閱人而爲世人
冉冉而行暮人何世而弗新世何人之能故亮造化之
若茲吾安取夫久長痛靈根之夙隕怨具爾之多喪悼
堂構之隕瘁愍城闕之邱荒親彌懿其已逝交何戚而
不亡彌年時之詎幾夫何往而不殘或冥邈而旣盡或
寥廓而僅半信松茂而栢悅嗟芝焚而蕙歎苟性命之
弗殊豈同波而異瀾年彌往而念廣塗薄暮而迫迮顧

舊要于遺存得十一于千百 又愍思賦曰予屢抱孔
懷之痛而奄復喪同生姊銜恤哀傷一載之間而喪制
便過故作此賦以紆慘惻之感時方至其儵忽歲旣去
其晚晚樂來日之可繼傷頽年之莫纂覽萬物以澄念
怨伯姊之已遠尋遺塵而思長瞻日月之何短升降兮
階際顧盼兮屏營雲承宇兮藹藹風入室兮泠泠僕從
爲我悲孤鳥爲我鳴 鈕滔母孫氏悼艱賦曰伊稟命
之不辰遭天難之靡忱夙無父之何怙哀壅瘁以抽心
覽蓼莪之遺詠詠肥泉之餘音經四位之代謝雖積祀
而思三從而有歸爰奉嬪于他族仰慈姑之惠和

荷仁澤之陶渥釋裝服以斬衣代羅幃以縞布仰慈尊
以飲泣撫孤景以協慕遇飛廉之暴骸觸驚風之所會
扶搖奮而上躋頽雲下而無際頓余邑之當春望峻陵
而鬱青瞻空宇之寥廓愍宿草之發生顧南枝以永哀
向北風以飲泣情無觸而不悲思無感而不集 宋謝
靈運感時賦曰夫逝物之感有生所同頽年致悲時懼
其速豈能忘懷乃作斯賦相物類以追已閱交臂之匪
賒揆大耋之或遄指崦嵫于西河鑒三命于予躬怛行
年之蹉跎于鷓鴣之先號挹芬芳而風過微靈芝之頻
秀迫朝露其如何雖發歎之早晏諒大暮之同科 又

傷已賦曰嗟夫卞賞珍于連城孫別駿于千里彼珍駿
以貽愛此陋容其敢擬丁曠代之渥惠遭謬眷于君子
眺徂歲之驟經覩芳春之每始始春芳而羨物終歲徂
而感已貌憔悴以衰形意幽翳而苦心出衾裯而載坐
闕檐幌以迥臨望步檐而周流眺幽闈之清陰想輕綦
之往跡餐和聲之餘音播芬煙而不燠張明鏡而不照
歌白華而絕曲奏蒲生之促調 顏延之行殯賦曰嗟
我來之云遠覩行殯于水隅崩朽棺以掩壙仰枯頽而
枕衢資沙礫以含實藉水草之穢儲撫躬中塗太息蘭
渚行徘徊于永路時悄愴于川侶 鮑照傷逝賦曰晨

登南山望美中河露團秋槿風卷寒蘿悽愴傷心悲如
之何盡若窮煙離若箭弦如影滅地猶星隕天棄華宇
于明世閉金局于下泉循堂廡而下降歷幃戶而升基
志存業而遺緒身先物而長辭日月飄而不留命儵忽
而誰保髮迎憂而送華貌先悴而收藻 梁蕭子範傷
往賦曰彼蘭菊之芳茂及藻槿之榮色終於邑乎繁霜
俱飄飄于路側引輕華之微珍猶見嗟于有識况獨立
之妍媛信盈盈而挺植去倡家而來儀承君子之宴息
催麗容而思進豈蛾眉之肯抑咏美媵而自箴歌忠妾
而爲式痛妖姿之不留惜華年之中天冀罷祥之永慶

忽從飈而先標魂一逝而莫追夕有長而無曉惟君侯
之惆悵覽遺物而霑巾帷半垂而將下尚彷彿而疑真
懷方士之良術顯有憑而致神 周庾信哀江南賦曰
粵以戊辰之年建亥之月大盜移國金陵瓦解信年二
毛卽逢喪亂狼狽流離至于暮齒燕歌遠別悲不自勝
楚老相逢泣將何及鍾儀君子入就南冠之囚季孫行
人留守西河之館申包胥之頓地碎之以首蔡威公之
淚盡加之以血孫策以天下爲三分衆纔一旅項羽用
江東之子弟人唯八千遂乃分裂山河宰割天下豈有
百萬義師一朝卷甲芟夷斬伐如草木焉江淮無涯岸

之阻亭壁無藩籬之固將非江表王氣應終于三百年
乎嗚呼山岳崩頽既履危亡之運春秋迭代必有去故
之悲天意人事可以悽愴傷心者矣賦曰始則王子召
戎姦臣介冑旣官政而離邊遂師言而泄漏爾乃傑黠
搆扇憑陵畿甸青袍如草白馬如練天子履端廢朝單
于長圍高宴竟遭夏臺之禍遂覩堯城之變遂乃韓分
趙裂鼓臥旗折失羣班馬迷輪亂轍猛士嬰城謀臣卷
舌昆陽之戰象走林常山之陣蛇奔穴五郡則兄弟相
悲三州則父子離別于是桂林顛覆長洲麋鹿潰潰沸
騰茫茫慘黷駭動天關爭迴地軸探雀殼而未飽待熊

蹠而詎熟乃有車側郭門筋懸廟屋鬼同曹社之謀人
有秦庭之哭西瞻博望北臨元圃月榭風臺池平樹古
仁壽之鏡徒懸茂陵之書空聚中宗之夷凶靖亂大雪
冤恥去代邸而承基遷唐郊而纂祀反舊章于司隸歸
餘風于正始沈猜則方逞其欲藏疾則自矜于已天下
之事沒焉諸侯之心搖矣旣而齊交北絕秦患西起况
背關而懷楚冀端委而開吳驅綠林之散卒拒驪山之
叛徒問諸淫昏之鬼求諸厭劾之巫荆門遭廩延之戮
夏口濫達泉之誅况以沴氣朝浮妖精夜殞赤鳥則三
朝夾日蒼雲則七重圍軫亡吳之歲旣窮入郢之年斯

盡周含鄭怒楚結秦寃有南風之不競值西鄰之責言
俄而梯衝亂舞冀馬雲屯伐秦車于暢轂沓漢鼓于雷
門雖復楚有七澤人稱三戶辭洞庭兮木落去潯陽兮
極浦熾火兮焚旗貞風兮害蠱乃使玉軸揚灰龍文折
柱下江餘城長林故營徒思拊馬之秣未見燒牛之兵
章曼支以轂走宮之奇以族行河無冰而馬渡關未曉
而雞鳴忠臣解骨君子吞聲章華望祭之所雲夢僞遊
之地荒谷縊于莫敖冶甫囚乎羣帥礪笄摺拉鷹鷂批
攢于時瓦解冰泮風飛雹散渾然千里淄澠一亂雪暗
如沙冰橫似岸逢赴洛之陸機見離家之王粲莫不聞

隴水而掩泣向關山而長歎

增唐蕭穎士登臨河城

賦曰亡舅孝康元君才高位下一命屈臨河尉尋遭風
察有加無瘳憂悒迄逾一紀故不復仕舅于予有教授
之恩隻詞片字皆資訓誘天寶元年秋八月奉使求遺
書于人間越來月局于臨河之舊邑覽物增懷泣然有
賦詞曰登孤城兮見河水之漫漫城有隍兮水瀾欵翻
覆兮無端俯崇墉兮心酸心斷絕兮河水之干惟佩觿
之弱歲荷哲舅之矜憐備潤身之黼藻聞染翰之蹄筌
豈期文嗣作者價參時賢匪舅德其焉爾諒師資乎在
焉痛才高而位下悲道悠而運促甫一命于並城蹇無

媒兮窘束僚層廳而墜羽凌永路而傾軸昔自公而暇
豫陪作賦于茲樓懷一紀以如昨慘今晨而獨遊俯蕭
條之邑里對零落之徂秋舊館悽其在目長川逝而不
留徒臨風而揮涕孰知夫四望而可以銷憂者哉 郗
昂驪山傷古賦曰嗚呼驪山之隧其庸幾年上周五里
下錮三泉罄珠璣之布濩盡金石之雕鐫匠人勞而不
償反生理于鬼誕狐兔穴而塵積牧豎焚而火連嗟拔
山之壯氣成拱木之寒煙百二之襟帶莫守數仞之邱
墳巍然何德之衰絕伯翳之餘業何力之競爲劉炎之
著鞭 梁肅過舊園賦并序曰余行年十八歲當上元

辛丑盜入洛陽因竄身東下旅于吳越轉徙阨難之中
者垂二十上年上嗣位歲應詔詣京師其年夏除東宮校
書郎遂請告歸觀于江南八月過嶠澗次于新安東南
十數里舊居在焉時歲滋遠荆榛蕪翳喬木蒼然三徑
莫辨訪鄰老而已盡盼庭柯以霑衣情之所鍾可勝歎
邪詞曰白露旣戒夫清秋爰駕言而東邁漫征路之悠
悠旦子發乎新安歷函關之舊邱灌叢森以相屬披一
徑而可求問里巷之罕人辨原田而莫由堂除旣缺衡
宇亦折樹蔽戶而稍稍水衡隄而活活駭獸羣起頽墉
四達識舊井于庭隅弔重蘿于木末旣循省而顧慕愈

辛酸而慘怛 劉禹錫傷往賦曰人之所以取貴于飛走者情而誕者以遺情爲智豈至言邪予授室九年而鰥痛若人之天闕弗遂也作賦以傷之冀夫覽者有以增伉儷之重云我行其野農民桑者舉案來饁亦在林下我觀于途禪販之夫同荷均擊荆釵布襦物莫失儷以孤處我方踽踽而焉如我復虛室日淒涼兮心伊鬱心伊鬱兮將語誰坐匡牀兮撫嬰兒指遺桂兮能忍愬空帷兮欲歸我入寢宮痛人亡兮物改其容寶瑟僵兮絃柱絕瑤臺傾兮錦奩空寒爐委灰虛幌多風闕刀尺之餘澤見巾箱之故封想翩翩于是非求窅窅于冥蒙

信奇術之可致嗟此生兮不逢還抱影以獨出乃百哀而攻中 又三良塚賦曰魯文六年秦伯任好卒以子車氏之三子爲殉皆秦之良也國人哀之爲之賦黃鳥秋季月吾西遊汧渭出于岐雍之間于古道傍得三良塚心甚哀之詞曰宛其三子遭時迤邐主已卽世身皆靡全指冥茫而爲期撫昭世而坐捐方惴惴以臨穴且哀哀而號天上刺衰德下傷幽魂挂驂壠樹脫劍山門掇野芳以爲薦汲行潦而充罇矧今情之猶悲諒古恨之潛吞 李德裕項王亭賦曰登彼高原徘徊始曙尚識艤舟之岸焉知繫馬之樹望牛渚而蒼然歎烏江之

舊渡想山川之未改嗟人世之何遽思項氏之入關按
秦圖而割據恃八千之剽疾棄百二之險固咸陽不留
王業已去嗟乎楚聲既合漢圍已布歌數闕而甚悲酒
盈樽而不御當其盛也天下侯伯自我而宰制及其衰
也帳中美人寄命而無處

原書晉劉臻妻陳氏荅舅母書曰元方春秋始富德業
亦隆弘道博文才質兼備真志與時暢榮耀當年豈意
一朝真然長往元方冲幼過庭莫聞聖善明訓業成三
徙亦既冠婚雙譽允集庶幾偕老色養膝下而殃厲橫
流艱禍仍遘媛姊傾逝宗模永絕姊方元華年並天戚

豈慮豈圖禍降彌酷良才天闕始立崇基殞于一簣仰
痛殄滅俯悼二弟斯人斯命當可奈何母年踰耳順備
經百罹一紀之中四遭至痛目前廓然三從靡託窮悼
中發情馳難處

三才圖會

卷之四

四

古香齋新刻袖珍淵鑑類函卷二百六十四

